

未
卷十六

外科

景岳全書卷之四十七賢集

會稽 張介賓 會稽

休寧 查廷璋禮南氏訂

外科鈴下

發背 四十二

發背屬督脉膀胱經凡陰虛火盛或醇酒厚味或鬱怒房勞或
舟石熱毒皆能致之若腫赤痛甚脉洪數而有力者熱毒之
證也為易治若漫腫微痛色黯作渴脉雖洪數而無力者陰

虛之證也爲難治若不腫不痛或漫腫色黯脉微細者陽氣
虛甚也尤爲難治大抵發背之證其名雖多總惟陰陽二證
爲要若發一頭或二頭其形焮赤腫高發熱疼痛頭起者爲
癰屬陽易治若初起一頭如粟不腫不赤悶痛煩躁大渴便
秘睡語咬牙四五日間瘡頭不計其數瘡口各含如粟形如
蓮蓬故名蓮蓬發積日不潰按之流血至數日或八九日其
頭成片所含之物俱出通結一衣揭去又結其口共爛爲一
瘡其膿內攻其色紫黯者爲疽屬陰難治且此證不可大痛
又不可痛若見煩悶者多不治總之瘡瘍雖云屬火然未有

不由陰虛而致者故經云督脉經虛從腦而出膀胱經虛從背而出故不可專泥于火

陳良甫曰背疽之源有五一天行二瘦弱氣滯三怒氣四腎氣虛五飲冷酒食灸燻服丹藥

立齋曰大抵發背之證雖發熱疼痛形勢高大煩渴不寧但得脉息有力飲食頗進可保無虞其膿一潰諸證悉退多有因膿不得外泄以致疼痛若用敗毒寒藥攻之反致誤事若有膿急針之膿一出苦楚卽止膿未成而熱毒作痛者可用解毒之藥亦有腐潰尺餘者若無惡證則投以大補之劑肉最

全書卷四十七
外和
二
易生亦無所妨惟忌腫不高色不赤不掀痛脉無力不飲食
腫不潰腐不爛膿水清或膿多不止皆屬元氣虛也爲難治
宜峻補之其或膿血旣泄腫痛尤甚膿水臭敗煩躁時嗽腹
痛渴甚瀉利無度小便如淋乃惡證也皆不可治

又灸法曰予常治發背不問日期陰陽腫痛或不痛或痛甚
但未成膿或不潰者卽與灸之隨手取效或麻木者明灸之
毒氣自然隨火而散或瘡頭如黍者灸之不效亦有數日色
尚微赤腫尚不起痛不甚膿不作者尤宜多灸勿拘日期更
服甘溫托裏藥切忌寒涼之劑其有勢未定者或先用箍藥

圍之若用烏金膏點患處尤妙凡人初覺發背赤熱腫痛莫辨其頭者但以濕紙覆其上立候視之其紙有先乾處卽是結癰頭也取大蒜切成片如二三錢厚薄安於頭上用大艾炷灸之三壯換一蒜片痛者灸至不痛不痛灸至痛時方止最要早覺早灸爲上一日二日十灸十活三日四日六七活五日六日三四活過七日則難爲力矣若有十數頭作一處生者卽用大蒜研成膏作薄餅鋪頭上聚艾於蒜餅上燒之亦能活也若背上初發赤腫一片中間有一片黃粟米頭子便用獨蒜切去兩頭取中間半寸厚者正安于瘡上灸十四

壯多至四十九壯蓋如此惡證惟隔蒜灸及塗烏金膏有效
又治法曰腫硬痛深脉實者邪在內也可下之○腫高焮痛
脉浮者邪在表也宜托之○焮痛煩躁或咽乾火在上也宜
瀉之○腫高或不作膿者邪氣凝結也宜解之○腫痛飲冷
發熱睡語者火也宜清之○不作膿或不潰不斂者陽氣虛
也宜補之○瘡肉不腐或積毒不解者陽氣虛也宜助陽氣
○膿多或清者氣血俱虛也宜峻補之○脉浮大或濇而肌
肉遲生者氣血俱虛也宜補之○右關脉弱而肌肉遲生者

宜補脾胃

又諸毒治法曰如頭痛有表證者宜先服人參敗毒散一二劑○如焮痛發熱脉數者用金銀花散槐花酒神功托裏散○如疼痛腫硬脉實者以清涼飲仙方活命飲苦參丸○腫硬木悶疼痛發熱煩躁飲冷便秘脉沉實者內疎黃連湯或清涼飲○大便已通欲其作膿宜仙方活命飲托裏散蠟礬丸外用神異膏○如飲食少思或不甘美用六君子湯加藿香連進三五劑更用雄黃解毒散洗患處每日用烏金膏塗瘡口處俟有瘡口卽用紙作撚蘸烏金膏絛入瘡內○若有膿爲脂膜間隔不出或作脹痛者宜用針引之腐肉堵塞者

去之若瘀肉腐動用猪蹄湯洗之○如膿稠或痛飲食如常
瘀肉自腐用消毒與托裏藥相兼服之仍用前一膏塗貼○
若腐肉已離好肉者宜速去之○如膿不稠不稀微有疼痛
飲食不甘瘀肉腐遲更用桑柴灸之亦用托裏藥○若瘀肉
不腐或膿清稀不焮痛者急服大補之劑亦用桑木灸之以
補接陽氣解散鬱毒○常觀患疽稍重未成膿者不用蒜灸
之法及膿熟不開或待腐肉自去則多致不救○大抵氣血
壯實或毒少輕者可假藥力或自腐潰若怯弱之人熱毒中
隔內外不通不行針灸藥無全功矣○此證若膿已成急宜

開之否則重者潰通臟腑腐爛筋骨若使透膈則不可治輕者延潰良肉難於收功因而不斂者多矣

又諸補治法曰若腫焮作痛寒熱作渴飲食如常此形氣病氣俱有餘也先用仙方活命飲後用托裏消毒散解之○漫腫微痛或色不赤飲食少思此形氣病氣俱不足也用托裏散調補之○不作膿或膿成不潰陽氣虛也托裏散倍加肉桂參芪○膿出而反痛或膿清稀氣血俱虛也八珍湯○惡寒形寒或不收斂陽氣虛也十全大補湯○晡熱內熱或不收斂陰血虛也四物加參朮○作嘔欲嘔或不收斂胃氣虛

也六君加炮薑○食少體倦或不收斂脾氣虛也補中益氣
湯加茯苓半夏○肉赤而不斂血熱也四物加山梔連翹○
肉白而不斂脾虛也四君加酒炒芍藥木香○小便頻數者
腎陰虧損也加減八味丸○大抵瘡毒勢甚若妄用攻劑怯
弱之人必損元氣因而變證者衆矣

又三證治法曰若初患未發出而寒熱疼痛作渴飲冷此邪
氣內蘊也仙方活命飲若口乾飲熱漫腫微痛此元氣內虛
也托裏消毒散若飲食少思肢體倦怠此脾胃虛弱也六君
子湯如未應加薑桂其有死者乃邪氣盛真氣虛而不能發

出也在於旬餘之間見之○若已發出用托裏消毒散不腐
潰用托裏消毒散如不應急宜溫補脾胃其有死者乃真氣
虛而不能腐潰也在於二旬之間見之○若已腐潰用托裏
散以生肌如不應急溫補脾胃其有死者乃脾氣虛而不能
收斂也在於月餘見之此三證雖不見於經籍余嘗治而歷
驗者

千金方灸法治發背已潰未潰者用淡荳豉以水和搗成硬泥
依腫大小作餅三四分厚如已有瘡孔勿置瘡孔上但四布
豆餅列艾其上灸之使微熱勿令破肉如熱痛急少起之日

灸二度如先有瘡孔孔出汁卽瘥

一驗透膈法凡背疽大潰欲驗穿透內膜者不可用皂角散噓法但以紙封患處令病者用意呼吸如紙不動者未穿透也倘用取噓法鼓動內膜則反致穿透慎之慎之

都憲周弘岡背患疽腫而不潰脉大而浮此陽氣虛弱而邪氣壅滯也用托裏散倍加參芪反內熱作渴脉洪大鼓指此虛火也用前散急加肉桂脉證頓退仍用托裏而愈若以爲熱毒而用寒藥則誤矣○上舍張克恭患此內服外敷皆寒涼敗毒遍身作痛欲嘔少食晡熱內熱惡寒畏寒余曰遍身作

痛營衛虛而不能營於肉裏也欲嘔少食脾胃虛寒而不能
消化飲食也內熱晡熱陰血內虛而陽氣陷於陰分也惡寒
畏寒陽氣虛弱而不能衛於肌肉也此皆由脾胃之氣不足
所致遂用補中益氣湯諸證漸退更以十全大補湯腐肉漸
潰又以六君子湯加芎歸肌肉頓生而愈○府痒彭碧溪患
腰疽服寒涼敗毒之藥色黯不痛瘡頭如鋪黍背重不能安
寢耳聾目白面色無神小便頻澀作渴迷悶氣粗短促脉浮
數重按如無余先用滋水之藥一劑少頃便利渴止背即輕
爽乃砭出瘀血以艾半筋許明灸患處外敷烏金膏內服參

芪歸朮肉桂等藥至數劑元氣稍復自疑肉桂辛熱一日不用手足並冷大便不禁仍用肉桂及補骨脂二錢肉豆蔻一錢大便復常其肉漸潰更用當歸膏以生肌肉八珍湯以補氣血而愈○上舍蔡東之患此余用托裏之藥而潰瘡口尚未全斂時值仲冬且兼咳嗽余曰瘡口未斂脾氣虛也咳嗽不止肺氣虛也法當補其母一日與之全宴見忌羊肉余曰補可以去弱人參羊肉之類是也最宜食之遂每日不徹旬餘而瘡斂嗽亦頭愈矣○一男子年踰五十患發背色紫腫痛外皮將潰寢食不安神思甚疲用桑柴灸患處出黑血卽

鼾睡覺而諸證如失服仙方活命飲二劑又灸一次膿血皆
出更進二劑腫痛大退又服托裏消毒散數劑而斂夫瘡勢
熾甚本宜峻劑攻之但年老血氣衰弱况又發在肌表若專
於攻毒則胃氣先損必反誤事

俱薛按

予長男於二週患背疽治按在腫瘍條中

新按

一論外通用方

神仙薰照法

外一二三

腦疽

四十三

立齋曰腦疽屬膀胱經積熱或濕毒上壅或陰虛火熾或腎水

虧損陰精消涸所致○若腫痛未作膿者宜除濕消毒○大
痛或不痛或麻木者毒甚也隔蒜灸之更用解毒藥○腫痛
便秘者邪在內也宜泄之○不甚痛或不作膿者虛也托裏
爲主○膿成脹痛者針之更以托裏○上部脉數實而痛者
宜降火○上部脉數虛而痛者宜滋陰降火爲主○尺部脉
數而作渴者滋陰降火○脉數而虛細無力或膿清或不斂
或膿多者大補血氣○不作膿或不潰者托裏藥主之○煩
躁飲冷脉實而痛者宜瀉火

又治法曰初起腫赤痛甚煩渴飲冷脉洪數而有力乃濕熱

上壅當用黃連消毒散並隔蒜灸以除濕熱○若漫腫微痛
渴不飲冷脉洪數而無力乃陰虛火熾當用六味丸及補中
益氣湯以滋化源○若口舌乾燥小便頻數或淋漓作痛乃
腎水虧損急用加減八味丸及前湯以固根本而引火歸經
○若不成膿不腐潰陽氣虛也四君加歸芪○若不生肌不
收斂脾氣虛也十全大補湯○若色黯不潰或潰而不斂乃
陰精消涸名曰腦爍爲不治若攻補得宜亦有可愈○大凡
腫焮痛甚宜活命飲隔蒜灸之以解散瘀血按引鬱毒但艾
炷宜小而少若欲其成膿腐潰生肌收斂並用托裏爲主

李氏曰腦疽及頸項有疽不可用隔蒜灸恐引毒上攻宜灸足三里穴五壯氣海穴三七壯仍服涼血化毒之藥或以騎馬穴法灸之凡頭項咽喉生疽古法皆為不治若用此法多有生者如五香連翹漏蘆等湯國老膏萬金散皆可選用

見外科精

要

一老人患此色赤腫痛脉數而有力與黃蓮消毒散二劑少退更與清心蓮子飲四劑而消○一男子腫痛脉數以荆防敗毒散二劑而痛止更以托裏消毒藥而消○一男子焮腫疼痛發熱飲冷脉洪數與涼膈散二劑而痛止以金銀花散四

劑而潰更以托裏藥而愈○一老婦稟壯實潰而痛不止脈實便秘以清涼飲二劑而痛止更以托裏消毒藥而愈○一婦人冬間患此腫痛熱渴余用清熱消毒潰之而愈次年三月其舌腫大遍身發疔如葡萄不計其數手足尤多乃脾胃受毒也先各刺出黑血隨服奪命丹七粒出鼻汗瘡熱益甚便秘二日與大黃芩連各三錢升麻白芷山梔薄荷連翹各二錢生甘草一錢水煎三五沸服之大小便出臭血甚多下體稍退乃磨入犀角汁再服舌本及齒縫出臭血諸毒乃消更以犀角地黃湯而愈○一婦人患前證口乾舌燥內服清

熱外敷寒涼色黯不響胸中氣噎此內真寒而外假熱也彼
疑素有痰火不欲溫補余以參芪各五錢薑桂各二錢一劑
頓潰又用大補藥而愈○一男子頭項俱腫雖大潰腫痛益
甚兼作瀉煩躁不睡飲食少思其勢可畏診其脉則毒尚在
與仙方活命飲二劑腫痛退半與二神丸及六君子湯加五
味子酸棗仁四劑諸證少退飲食少進睡亦少得又與參苓
白朮散數服飲食頓進再與十全大補湯加金銀花白芷月

餘而瘥

薛按

耳瘡

四十四

立齋曰耳瘡屬少陽三焦經或足厥陰肝經血虛風熱或肝經
燥火風熱或腎經虛火等因○若發熱熯痛屬少陽厥陰風
熱用柴胡清肝散○若內熱痒痛屬二經血虛用當歸川芎
散○若寒熱作痛屬肝經風熱用小柴胡湯加山梔川芎○
若內熱口乾屬腎經虛火用加味地黃丸如不應用加減八
味丸餘當隨證治之

愚按薛氏所治耳證凡氣虛者以補中益氣湯加山梔黃芩血
虛者用八珍湯加柴胡丹皮肝火血虛者用梔子清肝散怒
動肝火者用加味道遙散肝脾受傷者朝用加味歸脾湯暮

用加味道遙散此其治之大約也○予嘗治一儒者年近三旬素有耳病每年常發發必腫潰至乙亥二月其發則甚自耳根下連頸項上連頭角耳前耳後莫不腫痛諸醫之治無非散風降火至一月後稠膿鮮血自耳迭出每二三日必出一酒鐘許然膿出而腫全不消痛全不減枕不可近食不可加氣體俱困自分其危延余治之察其形氣已大不足察其病體則腫痛如舊仍若有餘察其脉息則或見弦急或見緩弱此非實執可知然脉不甚緊而或時緩弱亦得潰瘍之體尚屬可治遂先以六味湯二三劑而元氣稍振繼以一陰煎

加牛旁子茯苓澤瀉仍倍加白茯苓爲君服五十餘劑外用
降癰散晝夜敷治兩月而後愈蓋此證雖似潰瘍有餘而實
以肝腎不足上實下虛一奇證也故存識之

新按

鬚疽 四十五

立齋曰鬚疽屬肝膽二經怒火或風熱血虛所致○若焮痛或
發熱者宜祛風清熱○焮痛發寒熱或拘急者發散表邪○
作膿焮痛托裏消毒○膿已成作痛者針之○不作膿或膿
成而不潰者俱宜托裏○不斂或膿清者宜峻補之

又治法曰若發熱作渴者用柴胡清肝散○腫覺痛甚者仙

方活命飲○若大勢已退餘毒未散用參苓歸朮爲主佐以川芎白芷金銀花以速其膿膿成仍用參苓之類托而潰之○若欲其生肌收斂腎虛者六味丸血虛者四物加參芪或血燥者四物湯或水不能生木者六味地黃丸氣虛者用補中益氣湯皆當滋其化源爲善

疔腮 四十六

立齋曰疔腮屬足陽明胃經或外因風熱所乘或內因積熱所致若腫痛寒熱者白芷胃風湯○內熱腫痛者升麻黃蓮湯○外腫作痛內熱口乾者犀角升麻湯○內傷寒涼不能消

潰者補中益氣湯○發熱作痛大便秘結清涼飲○表裏俱解而仍腫痛者欲作膿也托裏散○若飲食少思胃氣虛弱者六君子湯○肢體倦怠陽氣虛弱也補中益氣湯○膿毒既潰腫痛不減熱毒未解也托裏消毒散○膿出而反痛氣血虛也參芪內托散○發熱晡熱陰血虛也八珍湯○惡寒發熱氣血俱虛也十全大補湯○若焮腫痛連耳下者屬手足少陽經當清肝火○若連頤及耳後者屬足少陰經虛火當補腎水○此證而有不治者多泥風熱執用尅伐之劑耳

癰癧

四十七

癩癰之病屬三焦肝膽等經風熱血燥或肝腎二經精血虧損
虛火內動或恚怒憂思氣逆于肝膽二經二經常多氣少血
故怒傷肝則木火動而血躁腎陰虛則水不生木而血燥血
燥則筋病肝主筋也故累累然結若貫珠其候多生於耳前
後連及頤頷下至缺盆及胸腋之側又謂之馬刀其初起如
豆粒漸如梅李核或一粒或三五粒按之則動而微痛不甚
熱久之則日以益甚或頸項強痛或午後微熱或夜間口乾
飲食少思四肢倦怠或堅而不潰或潰而不合皆由氣血不
足故往往變爲癩癰外臺秘要云肝腎虛熱則生癩病機云

瘰癧不係膏梁丹毒火熱之變總因虛勞氣鬱所致止宜以
益氣養營之藥調而治之其瘡自消蓋不待汗之下之而已
也若不詳脉證虛實之異而槩用追蝕攻下及流氣飲十宣
散之屬則必犯經禁病禁以致血氣愈損必反爲敗證矣若
脉洪大以元氣虛敗爲不治若面色眊白爲金尅木亦不治
若眼內赤脉貫瞳人見幾條則幾年死使不求本而妄用殺
肝之劑則誤矣蓋伐肝則脾土先傷脾傷則損五臟之源矣
可不慎哉

齊氏曰瘰癧結核初覺時宜內消之如經久不除氣血漸衰肌

寒肉冷或膿汁清稀毒氣不出瘡口不合聚腫不赤結核無膿外證不明者並宜托裏膿未成者使膿早成膿已潰者使新肉早生血氣虛者托裏補之陰陽不和托裏調之大抵托裏之法使瘡無變壞之證所以宜用也

丹溪曰癰癤必起於足少陽一經不守禁忌延及足陽明經食味之厚鬱氣之久曰毒曰風曰熱皆此三端拓引變換須分虛實實者易治虛者可慮此經主決斷有相火且氣多血少婦人見此若月水不調寒執變生稍久轉爲潮熱自非斷慾食淡神醫不能療也

立齋曰：燼腫脈沉數者，邪氣實也，宜泄之。○腫痛憎寒發熱，或拘急者，邪在表也，宜發散。○因怒結核，或腫痛或發熱者，宜疎肝行氣。○腫痛脈浮數者，祛風清熱。○脈濡者，補血爲主。○脈弱者，補氣爲主。○腫硬不潰者，補氣血爲主。○抑鬱所致者，解鬱結，調氣血。○潰後不斂者，屬氣血俱虛，宜大補。○虛勞所致者，補之。○因有核而不斂者，腐而補之。○脈實而不斂，或不消者，下之。

又治法曰：若寒熱燼痛者，此肝火風熱而氣病也，用小柴胡湯以清肝火，並服加味四物湯以養肝血。○若寒熱旣止而

核不消散者此肝經火燥而血病也用加味道遙散以清肝
火六味地黃丸以生腎水○若腫高而稍軟面色痿黃皮膚
壯熱膿已成也可用針以決之及服托裏之劑○若經久不
愈或愈而復發膿水淋漓肌肉羸瘦者必純補之劑庶可收
歛否則變成九瘦內經曰陷脉爲瘦留連肉腠卽此病也外
用豆豉餅琥珀膏以驅散寒邪補接陽氣內服補中益氣湯
六味丸以滋腎水培肝木健脾土亦有可愈者
又治法曰大抵此證原屬虛損若不審虛實而犯經禁病禁
則鮮有不誤○常治此證先以調經解鬱更以隔蒜灸之多

自消如不消卽以琥珀膏貼之○俟有膿卽針之否則變生
他處設若兼痰兼陰虛等證只宜加兼證之劑不可干擾餘
經○若氣血已復而核不消却服散堅之劑至月餘不應氣
血亦不覺損方進必效散或遇仙無比丸其毒一下卽止二
藥更服益氣養營湯以調理之○若瘡口不斂宜用豆豉餅
灸之用琥珀膏貼之○若氣血俱虛或不慎飲食起居七情
者俱不治○然此證以氣血爲主氣血壯實者不用追蝕之
劑彼亦能自腐但取去之亦使易於收斂○若氣血虛者不
先用補劑而數用追蝕之藥適足以敗之矣○若發寒熱眼

內有赤脉貫瞳人者不治

灸瘰癧法取肩尖肘尖骨縫交接處各一穴卽手陽明經肩髃
曲池二穴也各灸七壯在左灸左在右灸右左右俱病者俱
灸之余常用之甚效薛氏以曲池云肘髆似亦未的也

又薛氏經驗方云治瘰癧已成未成已潰未潰者以手仰置
肩上微舉起則肘骨尖自見卽是灸處灸以三四十壯爲度
更服益氣養營湯灸三次瘡自除如患三四年不愈者辰時
灸至申時三灸卽愈更服補劑按此法乃單灸曲池以多爲
貴也然但用前法則已妙矣倘有未應者又當以此法治之

○又曰此治癰癤之秘法凡男子婦人若因恚怒傷肝氣血壅遏而不愈者宜灸此穴以疎通經絡如取此穴當以指甲掐兩肘兩肩四所患處覺有酸麻方是其穴

又法灸癰癤未成膿者用大蒜切片三錢厚安患處用艾壯於蒜上灸之每三五壯卽換蒜再灸每日灸十數蒜片以拔鬱毒如破久不合更用江西豆豉爲末以唾津和作餅如前灸之以助陽氣內服補藥外貼琥珀膏或太乙膏瘡口自合○又或瘡口已破核不腐則瘡口不能斂或貼琥珀膏不應須用針頭散傅之以去腐肉再以如神散傅之更服益氣養

營湯若氣血虛者先服益氣養營湯待血氣稍克方用針頭散仍服前湯

一男子患而腫硬久不消亦不作膿服散堅敗毒藥不應令灸肩尖肘尖二穴更服益氣養營湯月餘而愈○一婦人久潰發熱月經每過期且少用逍遙散兼前湯兩月餘氣血復而瘡亦愈但一口不收敷針頭散更灸前穴而痊常治二三年不愈者連灸三次兼用托裏藥必愈○一婦人因怒結核腫痛察其氣血俱實先以必效散下之更以益氣養營湯三十餘劑而消常治此證虛者先用益氣養營湯待其氣血稍克

乃用必效散取去其毒仍進前藥無不效者○田氏婦年踰三十瘰癧已潰不愈與八珍湯加柴胡地骨皮夏枯草香附貝母五十餘劑形氣漸轉更與必效散二服瘡口遂合惟氣血未平再與前藥三十餘劑而愈後田生執此方不問虛實槩以治人殊不知散中班貓性毒雖治瘰癧多服則損元氣若氣血實者先用此下之而投補劑或可愈若虛而用下藥或用追蝕藥瘡肉雖去而瘡口不合反致難治

俱薛按

治瘰癧痰核方 凡瘰癧初起未甚者卽宜服此或加夏枯草

更佳

用忍冬花蒲公英各四五錢以水二碗同煎湯朝夕代茶飲
之十餘日漸消然此藥但可治標若欲除根必須灸肩髃曲
池二穴

疔瘡 四十八

齊氏曰夫疔瘡者以其瘡形如丁蓋之狀者是也古方之論凡
有十種華元化之論有五色疔千金方說疔有十三種以至
外臺秘要神巧萬全其論頗同然皆不離毒氣客於經絡及
五臟內蘊熱毒凡初生一頭凹而腫痛青黃赤黑無復定色
令人煩躁悶亂或憎寒頭痛或嘔吐心逆以針刺瘡不痛無

血是其候也多因肥甘過度不慎房溷以致邪毒蓄結遂生
疔瘡內經曰膏梁之變足生大疔此之謂也其治之法急以
艾炷灸之若不覺痛者針疔四邊皆令血出以奪命丹或回
生丹從針孔絀之上用膏藥貼之仍服五香連翹湯漏蘆湯
等劑疎下之爲效○若或針之不痛無血者以猛火燒鐵針
通紅於瘡上烙之令如焦炭取痛爲效亦絀前藥用膏藥貼
之經一二日膿潰根出服托裏湯散依常療之以取平復○
如針之不痛其人眼黑或見火光者不可治也此邪毒之氣
入于臟腑故也○養生方云人汗入肉食食之則生疔瘡不

可不慎也

立齋曰此證多由膏粱厚味之所致或因卒中飲食之毒或感四時不正之氣或感蛇虫之毒或感死畜之穢各宜審而治之其毒多生於頭面四肢形色不一或如小瘡或如水泡或疼痛或麻木或寒熱作痛或嘔吐惡心或肢體拘急並宜隔蒜灸之痛則灸至不痛不痛灸至痛若灸而不痛則明灸之及針疔四畔去惡血以奪命丹一粒入瘡頭孔內仍以膏藥貼之並服解毒之劑或用荆防敗毒散○若針之不痛無血者宜用燒針治如前齊氏之法○若不省人事或牙關緊急

者以奪命丹爲末葱酒調灌之候醒更服敗毒散或奪命丹甚效○若生兩足者多有紅絲至臍生兩手者多有紅絲至心腹生唇面口內者多有紅絲入喉皆爲難治急宜用針於血絲盡處挑破使出惡血若紅絲近心腹者更挑破瘡頭去惡水以泄其毒亦以膏藥貼之多有生者○若患於偏僻下部之處藥力所難到者若專假藥力則緩不及事惟灸之則大有回生之功○疔之名狀雖有十三種之不同而治法但當審其元氣虛實邪之表裏庶不誤人於天札也若專泥於疎利表散非爲無益而反害之○凡人暴死者多是疔毒急

取燈遍照其身若有小瘡卽是其毒宜急灸之并服奪命丹等藥亦有復甦者

又曰脉浮數者散之○脉沉實者下之○表裏俱實者解表攻裏○麻木或大痛及不痛者並灸之更兼攻毒

操江張恒山左足次指患之痛不可忍急隔蒜灸三十餘壯卽能舉步彼欲速愈自敷涼藥遂致血凝肉死毒氣復熾再灸百壯服活命飲出紫血其毒方解脚底通潰腐筋爛肉甚多及將愈予因考績北上又誤用生肌藥反助其毒使元氣虧損瘡口難斂予回用托裏藥補之喜其稟實且客處至三月

餘方瘥○表甥居富右手小指患之或用針出血敷以涼藥
掌指腫三四倍六脉洪大此真氣奪則虛邪氣勝則實也先
以奪命丹一服活命飲二劑勢稍緩余因他往或又遍刺出
血腫延臂腕如大瓠手指腫大數倍不能消潰乃真氣愈虛
而邪氣愈盛也余回用大劑參芪歸朮之類及頻灸遍手腫
勢漸消後大便不實時常泄氣此元氣下陷以補中益氣湯
加補骨脂肉豆蔻吳茱萸五味子又以生脉散代茶飲大便
漸實手背漸潰又用大補藥五十餘劑漸愈

薛按

時毒 四十九

齊氏曰時毒者爲四時邪毒之氣而感之於人也其候發于鼻面耳項咽喉赤腫無頭或結核有根令人憎寒發熱頭疼肢體甚痛恍惚不寧咽喉閉塞人不識者將謂傷寒原夫此疾古無方論世俗通謂丹瘤病家惡言時毒切恐傳染經曰人身忽經變赤狀如塗丹謂之丹毒此風熱惡毒所爲自與時毒不同蓋時毒者感四時不正之氣初發狀如傷寒五七日之間乃能殺人若至十日之外則不治自愈也治宜辨之先診其脉凡滑數浮洪沉緊弦濡皆其候也但浮數者邪在表也沉濡者邪氣深也察其毒之甚者急服化毒丹以攻之實

熱便秘者大黃湯下之其有表證者犀角升麻湯以發之或
年高氣鬱者五香連翹湯主之○又於鼻內啗通氣散取十
餘嚏作效若啗藥不嚏者不可治之如嚏出膿血者治之必
愈凡左右看病之人日日用啗藥嚏之必不傳染切須記之
其病人每日用嚏藥三五次以泄熱毒此治時證之良法也
○凡經三四日不解者不可太下猶宜和解之以犀角散芩
連消毒飲甚者連翹湯之類至七八日大小便通利而頭面
腫起高赤者可服托裏散托裏黃芪湯如腫甚者宜砭患處
出惡血以泄其毒氣○此病若五日已前精神昏亂咽喉閉

金書卷四十七
外種
三
塞語言不出頭面赤腫食不知者必死之候治之無功矣然
而此疾有陰有陽有可汗者有可下者嘗見粗工但云熱毒
只用寒藥殊不知病有微甚治有逆從不可不審矣

羅謙甫云泰和二年先師監濟源稅時四月民多疫癘初覺憎
寒體重次傳頭面腫盛目不能開上喘咽喉不利舌乾口燥
俗云大頭天行親戚不相訪問染之多不救張縣令姪亦得
此病至五六日鑿以承氣加板藍根下之稍緩翌日其病如
故下之又緩終莫能愈漸至危篤或曰李明之存心於醫可
請治之遂請診視具說其由先師曰夫身半已上天之氣也

身半已下地之氣也此邪熱客於心肺之間上攻頭目而爲
腫盛用承氣下之以瀉胃中之實熱是誅伐無過也殊不知
適其所至爲故遂處一方用黃芩黃連味苦寒瀉心肺間熱
以爲君橘紅苦平玄參苦寒生甘草甘寒人參甘平瀉火補
氣以爲臣連翹鼠粘子薄荷葉苦辛平板藍根味苦寒馬勃
白殭蠶味苦平行少陽陽明二經氣不得伸桔梗味辛溫爲
舟楫不令下行升麻柴胡苦辛以散表邪共爲細末半用湯
調時時服之半蜜爲丸噲化之服盡良愈因嘆曰往者不可
追來者猶可及凡他所有病者皆書方以貽之全活甚衆時

人皆曰此方天人所製遂刊於石以傳永久命曰普濟消毒
飲

薛立齋曰此感四時不正之氣邪客心肺之間上攻頭目而爲
患與膏梁積熱之證不同硝黃之劑非大便秘實者不可用
若不審其因不辨其表裏虛實而槩用攻之必致有誤○裏
實而不利者下之○表實而不解者散之○表裏俱實而不
解者解表攻裏○表裏俱解而不消者和之○腫甚焮痛者
砭去惡血更用消毒之劑○不作膿或不潰者托之○飢年
普患者不宜用峻利藥當審而治之

又治法曰若脉浮者邪在表也用葛根牛旁湯犀角升麻湯
人參敗毒散之類以發之○脉沉瀋者邪在裏也用梔子仁
湯五利大黃湯之類以下之○表裏俱病而腫不退者用犀
角升麻湯甚者砭出惡血并用通關散搐鼻內取嚏以泄其
毒○表裏俱不解而內外俱實者防風通聖散○欲其作膿
者用托裏消毒散欲其收斂者用托裏散此法最爲穩當○
常見饑饉之際芻蕘之人多患之乃是胃氣有損邪氣從之
爲患也故凡以凶荒勞役而患此者多宜安裏爲主或用普

濟消毒飲最善

老人冬月頭面耳項俱腫痛甚便秘脈實此表裏俱實病也
與防風通聖散不應遂砭患處出黑血仍投前藥卽應又以
荆防敗毒散而瘳蓋前藥不應者毒血凝聚上部經絡藥力
難達故也惡血旣去其藥自效或拘用寒遠寒及年高畏用
硝黃而用托裏與夫尋常消毒之劑或不砭泄其毒專假藥
力鮮不危矣○一男子頭面腫痛服硝黃敗毒之劑愈甚診
之脈浮數其邪在表尚未解散用荆防敗毒散加玄參牛旁
子二劑勢退大半以葛根牛旁子湯四劑而痊

薛按

肺癰肺痿

五十

此證初起邪結在肺者惟桔梗杏仁煎爲治此之第一方在新
因三三

齊德之曰肺者五臟之華蓋也處於胸中主於氣候於皮毛勞
傷血氣腠理虛而風邪乘之內感於肺也故汗出惡風咳嗽
短氣鼻塞項強胸脇脹滿久久不瘥已成肺痿也○風中於
衛呼氣不入熱至於營則吸而不出所以風傷皮毛熱傷血
脈風熱相搏氣血稽留蘊結於肺變成瘡疽○診其脈候寸
口脈數而虛者肺痿也數而實者肺癰也若欲知其有膿但
脈見微緊而數者未有膿也緊甚而數者已有膿也○肺痿

之候久嗽不已汗出過度重亡津液便如爛瓜下如豕膏小便數而不渴渴者自愈欲飲者將瘥此由肺多唾涎而無膿者肺痿也○肺瘡之候口乾喘滿咽燥而渴甚則四肢微腫欬唾膿血或腥臭濁沫胸中隱隱微痛者肺疽也又聖惠曰中府隱隱微痛者肺疽也上肉微起者肺瘡也中府者穴名也是以候始萌則可救膿成則多死○又內經曰血熱則肉敗營衛不行必將爲膿大凡肺瘡當咳嗽短氣胸滿時唾膿血久久如粳米粥者難治若嘔膿而不止者亦不可治其嘔膿而自止者將自愈其脉短而濇者自痊浮洪而大者難治

其面色當白而反面赤者此火之尅金皆不可治○仲景曰
上氣面浮腫肩息其脉浮大不治又加利尤甚

馬益卿曰肺癰治法要畧先以小青龍湯一貼以解其風寒邪

氣然後以葶藶大棗瀉肺湯桔梗湯葦莖湯

見金匱要畧

隨證用

之以取膿此治腫瘍之例也終以內補黃芪湯以補裏之陰
氣此治潰瘍之例也○又曰肺癰已破入風者不治或用太
乙膏丸服以搜風湯吐之若吐膿血狀如肺癰口臭他方不
應者宜消風散入男子髮灰清米飲調下兩服可除

立齋曰凡勞傷血氣腠理不密外邪所乘內感於肺或入房過

度腎水虧損虛火上炎或醇酒炙燻辛辣厚味薰蒸於肺或
欬唾痰涎汗下過度重亡津液皆能致之其候惡風欬嗽鼻
塞項強胸脇脹滿呼吸不利咽燥作渴甚則四肢微腫欬唾
膿血若吐痰臭濁膿血腥穢胸中隱隱微痛右手寸口脈數
而實者爲肺疽若唾涎沫而無膿脈數而虛者爲肺痿也

又治法曰大抵勞傷血氣則腠理不密風邪乘肺風熱相搏
蘊結不散必致欬嗽若誤用汗下過度則津液重亡遂成斯
證○凡喘嗽氣急胸滿者表散之○欬嗽發熱者和解之○
欬而胸膈隱痛唾痰腥臭者宜排膿散○喘急恍惚痰盛者

宜平肺○唾膿脉短瀯者宜補之

又治法曰若欬嗽喘急者小青龍湯○欬嗽胸脹者葶藶大

棗瀉肺湯○欬膿腥濁者桔梗湯○欬喘短氣或小便短少

者佐以參芪補肺湯○體倦食少者佐以參朮補脾湯○欬

唾痰壅者腎虛水泛也六味地黄丸○口乾咽燥者虛火上

炎也加減八味丸○此證皆因脾土虧損不能生肺金肺金

不能生腎水故始成則可救膿成則多死苟能補脾肺滋腎

水庶有生者若專攻其瘡則脾胃益虛鮮有不誤者矣

陸司廳子春間欬嗽唾痰腥穢胸滿氣促皮膚不澤項強脉數

此肺疽也蓋肺系在頂肺傷則系傷故牽引不能轉側肺者
氣之本其華在毛其克在皮治以黃芪當歸川芎白芷貝母
知母麥冬瓜萋仁桔梗防風甘草兼以蠟礬丸及太乙膏治
之膿盡脉澁而愈○一男子面白神勞欬而胸膈隱痛其脉
滑數予以爲肺癰欲用桔梗湯不信仍服表藥致欬嗽愈甚
唾痰腥臭始悟乃服前湯四劑欬嗽少定又以四順散四劑
而脉靜更以托裏藥數劑而愈○一男子欬嗽喘急發熱煩
躁面赤咽痛脉洪大用黃連解毒湯二劑少退更以梔子湯
四劑而安○一男子患肺痿欬嗽喘急吐痰腥臭胸滿咽乾

脉洪數用人參平肺散六劑及飲童便諸證悉退更以紫苑
茸湯而愈童便雖云專治虛火常治瘡瘍焮腫疼痛發熱作
渴及肺痿肺癰發熱口渴者尤效○一男子面赤吐膿發熱
作渴煩躁引飲脉洪數而無倫次先用加減八味丸加麥冬
大劑一服熱渴頓止卽熟睡良久覺而神爽索食再劑諸證
頓減仍用前藥更以人參五錢麥冬二錢五分五味二錢水
煎代茶日飲一劑月餘而安此證面赤者當補肺腎面白者
當補脾肺治者審之○一婦人素血虛發熱欬嗽或用痰火
之劑後吐膿血面赤脉數其勢甚危此膿成而氣血虛也余

用八珍湯以補元氣用桔梗湯以治肺證因得漸愈○一儒
者患肺癰鼻流清涕欬吐膿血胸膈作脹此風邪外傷也先
用消風散加亂髮灰二服而鼻利又用四君加芎歸及桔梗
湯而愈後因勞役欬嗽吐膿小便滴瀝面色黃白此脾土不
能生肺金肺金不能生腎水也用補中益氣湯六味地黃丸
而愈○一僕年踰三十嗽久不愈氣壅不利睡臥不寧咯吐
膿血甚虛可畏其主已棄矣余以寧肺散一服少愈又服而
止大半乃以寧肺湯數劑而痊所謂有是病必用是藥若泥
前散性澁而不用何以得愈

薛按

乳癰乳巖 五十一婦人門亦有乳證當互察之

立齋曰乳房屬足陽明胃經乳頭屬足厥陰肝經男子房勞恚怒傷於肝腎婦人胎產憂鬱損于肝脾皆能致之○若因暴怒或兒口氣所吹腫痛者宜疎肝行氣○焮痛發寒熱者發散表邪○焮腫痛甚者清肝消毒並宜隔蒜灸○未成膿者疎肝行氣○不作膿或不潰者托裏為主○潰而不斂或膿清者宜大補脾胃氣血為主

又治法曰若膿出反痛或作寒熱氣血虛也十全大補湯○體倦口乾中氣虛也補中益氣湯○膿熱內執陰血虛也八

珍湯加五味子○欲嘔作嘔胃氣虛也補腎爲主或用香砂
六君子湯○食少作嘔胃氣虛寒也前湯加乾薑○食少泄
瀉脾氣虛寒也理中湯或加人參附子○若勞碌以致腫痛
氣血未復也八珍湯倍用參芪歸朮○若因怒氣以致腫痛
肝火傷血也八珍湯加柴胡山梔○若肝火血虛而結核不
消者四物湯加柴胡升麻○若肝脾氣血俱虛而結核者四
君子加芎歸柴胡升麻○鬱結傷脾而結核者歸脾湯兼神
效瓜蒌散○若爲兒所吹而發腫焮痛須吮通揉散否則成
癰矣若兼餘證亦當治以前法○若婦人鬱怒傷肝脾而結

核不痒不痛一二載始潰者名曰乳巖最難治療

又治法曰若忿怒傷肝厚味積熱以致氣不行竅不通乳不出則結而爲腫爲痛此陽明之血熱甚則肉腐爲膿若膿一成卽針出之以免遍潰諸囊之患○亦有所乳之子膈有滯痰口氣熅熱含乳而睡熱氣所吹遂成腫痛於初起時須吮啞使通或忍痛採散之失治必成癰患宜用青皮以疎厥陰之滯石膏以清陽明之熱甘草節以行污濁之血瓜蒞子以消腫導毒或加沒藥橘葉皂角針金銀花當歸更宜隨證消息加減而治仍用少酒佐之更用隔蒜灸之其效尤捷若有

膿卽針之否則通潰難於收斂

乳癰用蒲公英忍冬藤入少酒煎服卽欲睡是其功也及覺而

病安矣

見外科心法

一婦人患乳癰寒熱頭痛與荆防敗毒散一劑更與蒲公英一握搗爛入酒二三盞再搗取汁熱服粗熱菴患處而消丹溪

云此草散熱毒消腫核又散滯氣解金石毒之聖藥○一婦人左乳內腫如桃不痛色不變發熱漸消瘦以八珍湯加香附遠志青皮柴胡百餘劑又間服神效瓜蒌散三十餘劑膿潰而愈常見患者責效太速或不解七情及藥不分經絡虛

實者俱難治大抵此證四十以外者尤難治蓋因陰血日虛也○一婦人因怒左乳內腫痛發熱表取太過致熱益甚以益氣養營湯數劑熱止膿成欲用針彼不從遂腫脹大熱發渴始針之膿大泄仍以前湯月餘始愈○一男子左乳腫硬痛甚以仙方活命飲二劑而痛止更以十宣散加青皮四劑膿成針之而愈此證若膿成未破瘡頭有薄皮剝起者用代針之劑點起皮處以膏藥貼之膿亦自出但不若及時針之則不致大潰如膿出不利更絀入搜膿化毒之藥若膿血未盡輒用生肌之劑反助邪氣縱早合必再發不可不慎也○

一產婦因乳少服藥通之致乳房腫脹發熱作渴狀類傷寒以玉露散補之而愈夫乳汁乃氣血所化在上爲乳在下爲經若衝任之脉盛脾胃之氣壯則乳汁多而濃衰則少而淡所乳之子亦弱而多病此自然之理亦有屢產有乳再產却無或大便澁滯乃亡津液也三因論云產婦乳脉不行有二有血氣盛閉而不行者有血氣弱澁而不行者虛當補之盛當疎之盛者當用通草漏蘆土瓜根輩虛者當用煉成鍾乳粉猪蹄鯽魚之屬槩可見矣

俱薛按

一婦人久鬱右乳內結三核年餘不消朝寒暮熱飲食不甘此

乳巖也乃七情所傷肝經血氣枯槁之證宜補氣血解鬱結
藥治之遂以益氣養營湯百餘劑血氣漸復更以木香餅灸
之喜其謹疾年餘而消若用剋伐之劑以復傷血氣則一無
可保者○一妾乃放出宮人乳內結一核如栗欲用前湯彼
不信乃服瘡科流氣飲及敗毒散三年後大如覆碗堅破如
石出水不潰而歿○大抵鬱悶則脾氣阻肝氣逆遂成隱核
不痛不痒人多忽之最難治療若一有此宜戒七情遠厚味
解鬱結更以養血氣之藥治之庶可保全否則不治亦有數
載方潰而陷下者皆曰乳巖蓋其形似巖穴而最毒也慎之

則可保十中之一二

薛按

胃脘癰

五十二

立齋引聖濟總錄云胃脘癰由寒氣隔陽熱聚胃口寒熱不調故血肉腐壞以氣逆於胃故胃脉沉細以陽氣不得上升故人迎熱甚令人寒熱如瘧身皮甲錯或欬嗽或嘔膿唾血若脉見洪數膿已成也急宜排之設脉遲緊其膿未就有瘀血也急下之否則邪毒內攻腐爛腸胃矣丹溪云內疽者因飲食之毒七情之火相鬱而發用射干湯主之愚常以薏苡仁湯牡丹皮散太乙膏選用之亦效若吐膿血飲食少思宜助

胃壯氣爲主而佐以前法不可專治其瘡

腹癰

五十三

立齋曰腹癰謂瘡生於肚腹或生於皮裏膜外屬膏梁厚味七情鬱火所致○若漫腫堅硬肉色不變或脉遲緊未成膿也四君加芎歸白芷枳殼或托裏散○腫軟色赤或脉洪數已成膿也托裏消毒散○膿成而不外潰者氣血虛也臥針而刺之○焮腫作痛者邪氣實也先用仙方活命飲隔蒜灸以殺其毒後用托裏以補其氣○若初起欲其內消當助胃壯氣使根本堅固而以行經活血之藥佐之若用尅代之劑欲

全書卷四十七
外科
其消散則腫者不能潰潰者不能斂若用疎利之藥下其膿
血則少壯者多爲難治老弱者立見危亡若有食積疝氣類
此者當辨而治之

進士邊雲莊腹痛惡寒脉浮數余曰浮數之脉而反惡寒瘡疽
之證也不信數日後復請視之左尺洪數余曰內有膿矣仍
不信至小腹痛脹連及兩臀始悟余曰膿潰臀矣氣血俱虛
何以收斂急服活命飲一鍾臀潰一孔出膿斗許氣息奄奄
用大補藥一劑神思方醒每去後糞從瘡出痛不可當小腹
間如有物上挺卽發瘻不省人事煩躁脉大舉按皆實省而

細察之脉雖洪大按之如無以十全大補倍加參芪至四斤
更加附子二枚煎膏服之而瘕止又用十全大補湯五十餘
劑而瘡斂○上舍周一元患腹癰三月不愈膿水清稀朝寒
暮熱服四物黃栢知母之類食少作瀉痰涎上湧服二陳枳
實之類痰涎愈甚胸膈痞悶謂余曰何也余曰朝寒暮熱血
氣虛也食少作瀉脾腎虛也痰湧胸痞脾肺虛也悉因真氣
虛而邪氣實也當先壯其胃氣使諸臟有所稟而邪自退矣
遂用六君加黃芪當歸數劑諸證漸退又用十全大補湯肌
肉漸斂更用補中益氣湯調理而愈

薛按

腸癰 五十四

孫真人云腸癰爲病小腹重強按之則痛小便如淋時時汗出復惡寒身皮甲錯腹皮急如腫甚者腹脹大轉側有水聲或繞臍生瘡或膿從臍出或大便膿血脈洪數者已有膿也血下則安若妄治者必殺人

陳無擇曰腸癰爲病身甲錯腹皮急按之濡如腫狀腹無聚積身無熱脈數此爲腸內有膿久積陰冷所成也故金匱有用附子溫之其脈遲緊者膿未成可下之當有血洪數者膿已成不可下此以內結熱所成也故金匱有用大黃利之

千金方灸法曲兩肘正肘頭銳骨灸百壯下膿血而安

立齋曰此證因七情飲食所致○治法脉遲緊者未有膿也宜
牡丹皮湯下之○脉洪數者已有膿也用薏苡仁湯排之○
小腹疼痛小便不利膿壅滯也用牡丹皮散主之○若臍間
出膿者不治經云腸癰爲病不可驚驚則腸斷而死故患是
者其坐臥轉側極宜徐緩時少飲薄粥及服八珍湯固其元
氣靜養調理庶可保全其生

一男子裏急後重下膿脹痛此脾氣下陷也用排膿散蠟礬丸
而愈後因勞役寒熱體倦用補中益氣湯而安○一婦人膿

成腹脹痛小便不利脉滑數此膿毒內潰也服太乙膏丸三錢膿下升許脹痛頓退更以神效瓜萋散二劑而全退又以蠟礬丸及托裏藥十餘劑而安○一產婦小腹疼痛小便不利以薏苡仁湯二劑痛止更以四物湯加桃仁紅花下瘀血升許而愈○一婦人產後惡露不盡小腹患痛服瓜子仁湯下瘀血而痊凡瘀血停滯宜急治之緩則腐化爲膿最難治療若使流注骨節則患骨疽失治多爲敗證

薛按

附骨疽

五十五

附骨疽一證近俗呼爲貼骨癰凡疽毒最深而結聚於骨際者

皆可謂之附骨疽然尤惟兩股間肉厚處乃多此證蓋此證之因有勞傷筋骨而殘損其脉者有恃酒力房而困爍其陰者有憂思鬱怒而留結其氣者有風邪寒濕而湊滯其經者凡人於環跳穴處無故酸痛久而不愈者便是此證之兆速當因證調治不可遲也蓋其初起不過少陽經一點逆滯逆而不散則以漸而壅壅則腫腫則潰至其延漫則三陰三陽無不連及而全腿俱潰然此證無非元氣大虧不能運行故致留滯不散而後至決裂誠危證也若潰後脉和雖見困弱之甚只以大補氣血爲主皆可保全若潰後脉反洪芤而煩

躁不寧發熱口渴則必不可治○至若治此之法凡以勞傷筋骨而致者宜大營煎兼大防風湯治之○若酒色傷陰者宜八味丸六味丸或右歸丸兼大防風湯主之○若憂思鬱怒結氣者宜瘡科流氣飲或五香連翹湯兼大防風湯主之

○若風寒外襲者宜五積散兼大防風湯主之○大抵此證初起卽宜用大營煎溫補氣血或兼仙方活命飲通行毒氣有火者宜速用連翹歸尾煎以解散其毒仍宜速用隔蒜灸或豆豉餅尋頭灸之以速散其毒最爲捷法其有濕熱痰飲等證當並求後法以治之庶免大害也○若環跳久痛不已

或見臀股微腫度其已成勢不能散只宜速用托補專固根本使其速起速潰則根本既實雖凶亦無大害必且易潰易斂而易愈也若脉見滑數按之軟熟膿已成也速宜針之無使久留以防深蝕之患其有不明利害苟圖目前或用剋伐消散再傷元氣或用寒涼敷藥以遏其毒氣必致日延日甚而元氣日敗則一潰不可收拾矣考諸方書俱未詳及此證故悉其所因并附治按於後

立齋曰附骨疽有因露臥風寒深襲於骨者有因形氣損傷不能起發者有因剋伐之劑虧損元氣不能發出者有因外敷

寒藥血氣凝結於內者凡此皆宜灸熨患處解散毒氣補接
元氣溫補脾胃爲主○若飲食如常先用仙方活命飲解毒
散鬱隨用六君子湯補托營氣若體倦食少但用前湯培養
諸臟使邪不得勝正○若膿已成卽針之使毒氣不得內侵
帶生用針亦無妨如用火針亦不痛且使易斂○其隔蒜灸
能解毒行氣葱熨法能助陽氣行壅滯此雖不見於方書予
常用之大效其功不能盡述惟氣血虛脫者不應

又曰大抵此證雖云腫有淺深感有輕重其所受皆因真氣
虛弱邪氣得以深襲若真氣壯實邪氣焉能爲患也故附骨

癰疽及鶴膝風證惟腎虛者多患之前人用附子者以溫補
腎氣而又能行藥勢散寒邪也亦有體虛之人秋夏露臥爲
冷氣所襲寒邪伏結多成此證不能轉動乍寒乍熱而無汗
按之痛應骨者是也若經久不消極陰生陽寒化爲熱而潰
也若被賊風所傷患處不甚熱而洒淅惡寒不時汗出熨之
痛止少者須大防風湯及火龍膏治之若失治則爲彎曲偏
枯有堅硬如石者謂之石疽若熱緩積日不潰肉色赤紫皮
肉俱爛名緩疽其始末皆宜服前湯欲其驅散寒邪以補虛
托裏也

又曰此證亦有產後惡血未盡臍腹刺痛或流於四肢或注於股內疼痛如錐或兩股腫痛此由冷熱不調或思慮動作氣所壅遏血蓄經絡而然宜沒藥丸治之亦有經血不行流注四肢或股內疼痛如錐或因水濕所觸經水不行而腫痛者宜當歸丸治之凡惡血停滯為患匪輕治之稍緩則流注為骨疽多致不救

一婦人膝腫痛遇寒痛益甚月餘不愈諸藥不應脉弦緊此寒邪深伏於內也用大防風湯及火龍膏治之而消○一男子腿根近環跳穴患痛徹骨外皮如故脉數而滯滑此附骨疽

膿將成也用托裏藥六劑腫起作痛脉滑數其膿已成針之
出碗許更加補劑月餘而瘳○一男子患附骨疽腫硬發熱
骨痛筋攣脉數而沉用當歸拈痛湯而愈○一男子腿內患
癰漫腫作痛四肢厥逆咽喉閉塞發寒熱諸治不效乃邪鬱
經絡而然也用五香連翹湯一劑諸證少退又服之大便行
二次諸證悉退而愈○一男子先腿痛後四肢皆痛遊走不
定至夜益甚服除濕敗毒之劑不應其脉滑而濇此濕痰濁
血爲患以二陳湯加蒼朮羌活桃仁紅花牛膝草烏治之而
愈凡濕痰濕熱或死血流注關節非辛溫之劑開發腠理流

通隧道使氣行血和焉能得愈○王時亨室產後腰間腫痛
兩腿尤甚此由瘀血滯於經絡而然也不早治必作骨疽遂
與桃仁湯二劑稍愈更以沒藥丸數服而痊

薛按

一魏生者年三十餘素多勞碌忽患環跳酸痛數月後大股漸
腫延予視之曰此附骨疽也速當治之與以活命飲二劑未
及奏效而腫益甚因慌張亂投或清火或解毒遂致嘔惡發
熱飲食不進其勢甚危然後懇求相救遂以參芪內托散大
加炮薑數劑而嘔止食進其腫軟熟知其膿成速令針之針
處出膿不多復以九味異功煎與之遂得大潰且瓣瓣出膿

潰者五六處而腿肉盡去止剩皮骨矣潰後復嘔惡發熱不食遂以十全大補湯及九味異功煎相間與之然後熱漸退食漸進稍有生色然足筋短縮但可豎膝仰臥左右挨緊毫不能動動則痛極自分已成廢物此後凡用十全大補湯八十餘劑人參三斤而腿肉漸生筋舒如故復成一精壯男子此全得救本之功也○一男子陳姓者年近三旬素不節慾忽見環跳酸痛月餘不愈予曰此最可畏恐生癰毒之患彼不信又謀之一庸醫反被其詬曰此等胡說真可笑也筋骨之痛亦常事耳不過風熱使然何言癰毒遂用散風清火等

藥至半年後果見微腫復來求治予曰速用托補以救根本
尚不遲也彼又不信而謀之瘍醫曰豈有腫瘍未潰而遽可
溫補耶復用清火消毒之劑及其大潰而危再延余視則脉
證俱敗方信予言而痛悔前失已無及矣○一膏梁子茅姓
者年未三旬素以酒色爲事亦患此證早令服藥執拗不從
及其腫而膿成令速針之亦畏痛不從而偏聽庸流敷以苦
寒解毒之藥不知膿旣已成尤不可解但有愈久愈深直待
自潰而元氣盡去不可收拾矣

新按

腎癰

五十六

馬益卿曰腎癰證腎居小腹之下此陰中之陰也道遠位僻雖
曰多血然氣運不到血亦罕來中年之後尤慮患此纔有腫
痛叅之脉證但見虛弱便與滋補氣血無虧可保終吉

立齋曰凡治此者毋傷脾胃毋損脾氣但當以固根本爲主○
若焮痛尺脉緊而無力者托之○腫硬痛甚者隔蒜灸之更
以解毒○不作膿者托裏爲主○不作膿而痛者解毒爲主
○不潰或潰而不斂者托裏爲主

又治法曰若腫硬作痛者形氣虛而邪氣實也用托裏消毒
散○微腫微痛者形氣病氣俱虛也用托裏散補之○欲作

膿者用內托羗活湯○若痛甚者用仙方活命飲○大勢既退亦用托裏消毒散○若脾虛不能消散或不潰不斂者六君子加芎歸黃芪○若陰虛不能消散或作渴便淋者六味丸加五味子○若陽虛不能潰或膿清不能斂者用補中益氣湯○氣血俱虛者十全大補湯○若腫硬未成膿者用隔蒜灸及活命飲○潰後宜豆豉餅及補中益氣十全大補二湯○若灸後大勢已退餘毒未消頻用葱熨以補其氣以消餘毒爲善

又曰凡毒氣已退不起者但可補其血氣使膿速成而針去

之不可用內消之論○若腫高而輒者發於血脉腫下而堅者發於筋骨肉色不變者發於骨髓也○膿血大泄之後當大補氣血爲先雖有他證以末治之

巡按陳和峯脾胃不健常服消導之劑左腿股及臀患腫余曰此脾氣虛而下注非瘡毒也當用補中益氣倍加白朮彼惑於衆人云白朮能潰膿乃專以散腫消毒爲主而腫益甚體益倦余用白朮一味煎飲而消○儒者楊啓元左臀患此敷貼涼藥腫徹內股服連翹消毒散左體皆痛余以爲足三陰虧損用補中益氣湯以補脾肺用六味丸加五味子以補肝

腎股內消而臀間潰又用十全大補湯而瘡口斂○一儒者
炊腫痛甚此邪毒壅滯用活命飲隔蒜灸而消後因飲食勞
倦腫痛復作寒熱頭痛此元氣虛而未能復也與補中益氣
湯頻用葱熨法兩月而愈○一男子患臀癰作膿而痛以仙
方活命飲二劑痛止更以托裏消毒散膿潰而瘥○一弱人
臀癰膿成不潰以十全大補湯數劑始托起乃針之又二十
餘劑而愈

薛按

流注 五十七

立齋曰流注之證多因鬱結或暴怒或脾氣虛濕氣逆於肉理

或腠理不密寒邪客於經絡或濕痰或閃撲或產後瘀血流
注關節或傷寒餘邪未盡爲患皆因真氣不足邪得乘之故
氣凝血聚爲患也然此證或生於四肢關節或生於胸腹腰
髻或結塊或漫腫或痛或不痛悉宜用葱熨法及益氣養營
湯固其元氣則未成者自消已成者自潰可全愈也若不補
氣血及節飲食慎起居戒七情而專用寒涼尅伐者俱不治
又治法曰常治此證凡暴怒所致胞膈不利者調氣爲主○
抑鬱所致而不痛者宜調經脉補氣血○腫硬作痛者行氣
和血○潰而不斂者補氣血爲主○傷寒餘邪未盡者和而

解之○脾氣虛濕熱凝滯肉理者健脾除濕爲主○閃跌瘀
血凝滯爲患者和血氣調經絡○寒邪所襲筋攣骨痛或遍
身痛宜溫經絡養血氣○若久而不斂瘡口無陽者宜豆豉
餅或附子餅灸之以祛散寒邪接補陽氣或外用琥珀膏貼
之○若內有膿管或生瘀肉而不斂者用針頭散腐之自愈
錠子尤效

醫林集要云骨疽乃流注之敗證也如用涼藥則內傷其脾外
冰其血脾主肌肉脾氣受傷飲食必減肌肉不生血爲脈絡
血受冰則氣血不旺而愈滯宜用理脾脾健則血自生而氣

自運行矣○又有白虎飛尸留連周基或展轉數歲冷毒朽
骨出盡自愈若附骨腐者可痊正骨腐則爲終身廢疾矣○
有毒自手足或頭面腫起或兼疼痛上至頸項骨節去處如
瘍癰貫珠此風濕流氣之證也宜以加減小續命湯及獨活
寄生湯治之○有兩膝腫痛起或至遍身骨節疼痛者此風
濕痺又名歷節風宜附子八物湯治之○又有結核在項腋
或兩乳傍或兩膀軟肉處名曰瘰癧屬冷證也又有小兒
宿痰失道致結核於頸項臂膊胸背之處亦冷證也俱宜熱
藥敷貼○已上諸證皆緣於腎腎主骨腎虛則骨冷而爲患

也所謂骨疽皆起於腎亦以其根於此也故用大附子以補腎氣腎實則骨有生氣而疽不附骨矣

一男子臂腫一塊微痛脉弦緊以瘡科流氣飲四劑而消○一婦人暴怒腰腫一塊胸膈不利時或氣走作痛用方脉流氣飲數劑而止更以小柴胡湯對四物加香附貝母月餘而愈

○一婦人稟弱性躁脇臂腫痛胸膈痞悶服流氣敗毒藥反發熱以四七湯數劑胸寬氣利以小柴胡湯對四物加陳皮香附腫痛亦退大抵婦人情性執着不能寬解多被七情所傷遂至遍身作痛或肢節腫痛或氣填胸滿或如梅核塞喉

燕吐不出或痰涎壅盛上氣喘急或嘔逆惡心甚者渴悶欲
絕產婦多有此證宜服四七湯先調滯氣更以養血之藥若
因憂思致小便白濁者用此湯吞青州白丸子屢效○一老
人傷寒表邪未盡肢內患腫發熱以人參敗毒散二劑熱止
灸以香附餅又小柴胡湯加二陳羌活川芎歸朮枳殼數劑
而散○一男子腿患潰而不斂用人參養營湯及附子餅更
以補劑煎膏貼之兩月餘而愈○一男子腿患腫肉色不變
不痛脉浮而滑以補中益氣湯加半夏茯苓枳殼木香飲之
以香附餅熨之彼謂氣無補法乃服方脉流氣飲虛愈甚復

求治以六君子湯加芎歸數劑飲食少進再用補劑月餘而
消夫氣無補法俗論也以其爲病痞塞似難於補殊不知正
氣虛而不能運行則邪氣滯而爲病經云壯者氣行則愈怯
者弱者則著而爲病苟不用補法元氣何由而行乎○一婦
人腿患筋攣骨痛諸藥不應脉遲緊用大防風湯二劑頓退
又二劑而安又一婦人亦然先用前湯二服更服黑丸子而
痊此二患若失治必潰成敗證○一男子肩胛患之微腫形
勞氣弱以益氣養營湯服黑丸子及木香生地黃作餅覆患
處熨之月餘膿成針之仍服前藥而愈○一男子臂腫筋攣

骨痛年餘方潰不斂診其脉更虛以內塞散一料少愈以十全大補湯及附子餅灸之而愈精要云留積經久極陰生陽寒化爲熱以此潰多成瘻宜早服內塞散排之○一男子臂患出腐骨三塊尚不斂發熱作渴脉浮大而澁乃氣血俱損須多服生血氣之藥庶可保全彼惑於火尚未盡仍用涼藥內服外敷幾危始求治其形甚瘁其脉愈虛先以六君子湯加芎歸月餘飲食漸進以八珍湯加肉桂三十餘劑瘡色乃赤更以十全大補湯外以附子餅灸之僅年而瘡

薛按

鶴膝風

五十八

凡肘膝腫痛臂胛細小者名爲鶴膝風以其象鶴膝之形而名之也或止以兩膝腫大胛腿枯細不能屈伸俗又謂之鼓槌風總不過風寒濕三氣流注之爲病也然腫痛者必有邪滯枯細者必因血虛凡治此者必宜以養氣滋血爲重有風者兼散其風有寒濕者兼去其寒濕若果由邪鬱成熱者必宜滋陰清火自無不愈其有痢後而成者又名痢後風此以瀉痢亡陰尤宜壯腎凡寒勝者宜三氣飲五積散或大防風湯之類主之濕勝者宜五苓散理中湯之類主之熱勝者宜保陰煎大秦芑湯之類主之若以陽氣不足而敗及四肢者非

右歸丸理陰煎及八味地黃丸之類不可

止齋曰鶴膝風乃調攝失宜虧損足三陰經風邪乘虛而人以
致肌肉日瘦內熱減食肢體攣痛久則膝大而腿細如鶴之
膝故爾名之○若傷於脾胃者用補中益氣湯為主若傷於
肝腎者六味地黃丸為主若欲其作膿或潰後者十全大補
湯為主皆佐以大防風湯○初起者須用葱熨法可以內消
○若津涸口乾中氣不足也補中益氣湯加五味子○頭暈
頭痛陽氣不升也補中益氣湯加蔓荊子○發熱晡熱陰血
虛弱也用四物參芪白朮○畏寒憎寒陽氣虛弱也用十全

大補湯○飲食少思胸膈膨脹脾胃虛痞也用四君子湯○
面色萎黃飲食少思脾胃虛弱也用六君子湯膿水清稀肌
肉不生氣血俱虛也用八珍湯○熱來復去有時而動無根
虛火也用十全大補湯○形瘦嗜臥寢息發熱痰盛作渴小
便頻數五臟虛損也用六味丸○臍腹疼痛夜多漩溺脚膝
無力頭暈吐痰腎氣冷敗也用八味丸○發熱大渴不欲近
衣面目赤色脉大而虛血虛發躁用當歸補血湯○或有痢
後而患者亦治以前法餘當臨證制宜

又曰夫立方之義各有所宜凡體氣虛弱邪入骨界遏絕隧

道若非用附桂辛溫之藥開散關節腠理之寒邪通暢隧道
經絡之氣血決不能愈且本草云附子治寒濕痿痺拘攣膝
痛不能行步以白朮佐之爲寒濕之聖藥又云桂通血脈消
瘀血堅骨節治風痺骨攣脚軟宣導諸藥及十全大補湯以
治前證不但不可去桂亦不可不加附子無此二味何以行
參芪之功健芎歸之性而補助血氣使之宣通經絡扶大虛
之證以收必效之功哉况前證在骨節之間關鍵之地治之
不速使血氣循環至此鬱而爲膿從此而泄氣血瀝盡無可
生之理矣亦有秋夏露臥爲寒所襲拂熱內作遂成附骨疽

亦有賊風搏於肢節痛徹於骨遇寒尤甚以熱熨之則少減
尤當以大防風湯治之更以蒜搗爛攤患處用艾鋪蒜上燒
之蒜壞再易皮膚倘破無妨若經久不消則極陰生陽潰而
出水必致偏枯或爲漏證宜服內塞散及附子餅灸之或脉
大或發渴者俱不治以其真氣虛而邪氣實也

張上舍患前證伏枕半載流膿三月彼云初服大防風湯去附
子將潰服十宣散今用十全大補湯而去肉桂俱不應視其
脉證甚弱予以十全大補湯每貼加熟附子一錢服三十餘
劑少愈乃去附子五分又服三十餘劑將愈却全去附子更

三十餘劑而痊○一男子左膝腫大三月不潰予謂體虛之人風邪襲於骨節使氣滯而不行故膝愈大而腿愈細名曰鶴膝風遂以大防風湯三十餘劑而消○州守張天澤左膝腫痛胸膈痞悶飲食少思時欲作嘔頭暈痰壅日晡益倦此脾肺氣虛也用葱熨及六君加炮薑諸證頓退飲食少進用補中益氣加蔓荊子頭目清爽間與大防風湯十餘劑又用補中益氣湯三十餘劑而消

薛按

多骨疽 五十九

立齋曰多骨疽者由瘡瘍久潰氣血不能營於患處邪氣陷襲

久則爛筋腐骨而脫出屬足三陰虧損之證也用補中益氣湯以固根本○若陰火發熱者佐以六味丸壯水之主以鎮陽光○陽氣虛寒者佐以八味丸益火之源以消陰翳○外以附子餅葱熨法祛散寒邪補接營氣則骨自脫瘡自斂也○夫腎主骨若腎氣虧損其骨漸腫在苒歲月潰而出骨亦用前法若投以尅伐之劑復傷真氣鮮有不誤者

下疳瘡 六十

下疳一證本肝腎濕熱證也若無外因而病者不過去其濕熱或滋真陰濕熱既清其瘡自愈無足慮也惟感觸淫毒而患

者毒有淺深則病有微甚皆宜用百草煎薰洗外以鰓蛸散敷之則輕者自愈若濕熱甚而爲腫爲痛者宜用芍藥茯苓煎兼而治之如毒甚者必用萆薢湯方可○若感觸淫邪毒自少陰直入精宮者不易愈卽治如前法然必見便毒廣瘡發出而後下疳始愈既見瘡毒卽當於本證條下求法治之○余嘗治一少年因偶觸穢毒遽患下疳始潰龜頸敷治不效隨從馬口延入尿管以漸而深直至肛門逐節腫痛形如魚骨每過夜則膿結馬口脹不得出潤而通之則先膿後尿敷洗皆不能及甚爲危懼余嘗遇一山叟傳得槐花葢方因

以治之不十日而莖根漸愈半月後卽自內達外退至馬口
而全愈疔愈後卽見些微廣瘡復與五加皮飲十餘劑而全
愈向彼傳方者曰此方善治淫瘡熱毒悉從小便泄去所以
能治此疔但服此者可免終身瘡毒後患然猶有解毒奇驗
則在瘡發之時但見通身忽有雲片紅斑數日而沒者卽皆
瘡毒應發之處瘡毒已解而瘡形猶見是其驗也予初未之
信及此人瘡發之時瘡固不多而通身紅斑果見凡兩日而
沒予始知瘡之有奇一至如此

新按

立齋曰下疔屬肝經濕熱下注或陰虛火燥治法腫痛發熱者

血虛而有熱也四物湯加柴胡山梔○腫痛寒熱者肝經濕熱也小柴胡湯加龍膽草黃連○腫痛便澁者濕熱壅滯也龍膽瀉肝湯○腫痛腐潰者氣血虛而有火也八物湯加山梔柴胡○日晡熱甚者陰血虛而有火也小柴胡湯加參朮芎歸○日晡倦怠者陽氣虛而下陷也補中益氣湯○有經久不愈而發寒熱者腎水不能生肝木也宜六味丸○若筋縮或縱或爲痒痛或出白津此筋疝也用龍膽瀉肝湯○氣虛者補中益氣湯加炒山梔炒龍膽○陰虛火燥者用六味丸○莖中痒出白津用補中益氣湯與清心蓮子飲間服○

蓋此證肝經陰虛爲本腫痛寒熱等證爲標須用六味丸以
生脾血凡脾土虛不能生金水而見一切肝證者當佐以補
中益氣湯加麥門冬以滋化源

一男子腫痛不消一男子潰而腫痛發熱小便秘澁日晡或熱

一小兒腫痛諸藥不應俱以小柴胡湯吞蘆薈丸數服而愈

○一小兒十五歲患前證雜用消毒之藥虛證悉具二年餘
矣詢之乃稟所致用葶薺湯月餘諸證漸愈又用補陰八珍

湯補中益氣二湯而痊○度吉士劉華甫或莖中作痛或竅
出白津或小便秘澁先用小柴胡湯加山梔澤瀉黃連木通

膽草茯苓二劑以清肝火導溫熱諸證漸愈後因勞倦忽然
寒熱此元氣復傷也用補中益氣而安又用六味丸以生肝
血滋腎水而全愈○一男子玉莖腫痛小便如淋自汗甚苦
時或尿血少許尺脈洪數按之則瀉先用清心蓮子飲加牛
膝山梔黃栢知母柴胡數劑少愈更以滋腎丸一劑而痊玉
機微義曰如自汗小便少不可以藥利之既已自汗則津液
外亡小便自少若再利之則營衛枯竭無以制火而煩熱愈
甚當俟熱退汗止小便自行也兼此證乃陽明經病大忌利

小便 俱薛按

海藏治下疳久不愈方

椽斗子二個合盛黃丹令滿以亂髮厚纏定燒烟盡為度同
研為細末先以葱白熱漿水洗瘡膿盡次上藥甚者不過三
次如神

又下疳方 下疳瘡內毒盛者必須治內方愈外治者須鰓
散或此方亦佳

人中白 生用

官粉 煨黃

紅丹 飛炒

右等分為末先用藥湯或濃茶洗淨然後敷藥每日二三
次或用豬油或用蜜水調敷之

便毒 六十一

便毒論治如薛氏之法固已詳矣然又惟交感不潔遭淫毒而
患者爲最多每每先起下疳下疳未已便毒繼之此濕熱穢
毒之爲患也凡初起腫痛尚未成膿而元氣尚強者速宜先
去其毒惟會膿散或牡蠣散爲最善○若已成膿則或針或
蝕惟速去其膿隨因證調補使速收口爲善○若初起一核
其痛微其腫漫者此有二證一以邪輕一以元氣虛弱毒深
而然若邪輕者只用會通膏加麝香貼之無有不散或降癰
散亦可若元氣虛弱而毒深者旣不肯散又不早潰愈久必

愈甚最爲可畏及其潰後多不能收輕則爲癰重則殞命此
惟大補元氣方不致害○若焮腫痛甚膿已將成勢不能消
宜用降癰散留頭圍之則勢可斂痛可解膿可速成而潰也
立齋曰便癰屬足厥陰肝經內熱外寒或勞役過度或房慾不
節或慾火不遂或強固其精或肝經濕熱而致大抵多患於
勞後不足精氣俱虛之人俗云一石米瘡此言百日方可愈
若大補血氣不旬日可愈何用百日蓋瘡之收斂在乎血氣
之盛也亦有內蘊熱毒而生者須辨虛實及成膿與否不可
槩投攻藥凡婦人患此者多在兩拘腫痛或腹中結塊小便

澁滯苟治者得法患者又能調攝無足慮也常見治此證者
槩用大黃之類下之以求內消或其膿成令膿從大便而出
鮮有見其痊也人多欲內消者蓋恐收口之難也若知補養
血氣不旬日而收矣何難之有若膿旣成豈有可消之理如
再用剋伐之劑必致難治

又曰便癰者血疝也俗呼爲便毒言於不便處爲癰也乃足
厥陰之經絡及衝任督脉亦屬肝之傍絡此氣血流通之道
路今壅而腫痛是則熱毒所致宜先疏導其滯更以托裏之
劑此臨證制宜之法也

又治法曰內熱外寒者牛黃雙解散○濕熱壅滯者宜用龍
膽瀉肝湯疎肝導滯○慾心不遂致逆精氣者先用五苓散
加大黃疎其逆滯後用地黃丸以補肝腎強固其精○房慾
不節者宜六味丸料○勞倦過度者補中益氣湯

一男子患便毒焮腫作痛大小便秘脈有方以玉燭散二劑頭

退更以龍膽瀉肝湯四劑而消○一男子膿未成大痛服消

毒托裏等藥不應診之脈洪大毒尚在以仙方活命飲一劑

痛止又劑而消○一儒者腫痛便澀用八正散二劑以清肝

火導濕熱而腫痛愈再以小柴胡加芎歸澤瀉山梔二劑以

清火補血而小便利○一男子已潰而痛不止小便秘瀯此
肝火未解也與小柴胡加黃栢知母芎歸痛止便利更以托
裏當歸湯而瘡斂若毒未解而痛不止者須用活命飲○府
庠沈尼文年二十左拘患之余以肝腎陰虛先用托裏藥潰
而將愈因入房發熱作渴右邊亦作痛膿水清稀虛證悉至
脉洪大而無力勢甚可畏用十全大補加附子一錢脉證頓
退再劑全退後用大補湯三十劑而愈○一男子腫而不潰
此因陽氣虛弱用參芪歸朮以補托元氣用白芷皂刺柴胡
甘草以排膿清肝數劑而潰以八珍加柴胡補其氣血數劑

而愈○春元凌待之虛而服尅伐藥幾至危殆余用托裏健脾藥而愈秀才王文遠因勞苦患之服小柴胡湯而表證散後用托裏藥膿成針之而旬日愈又胡判官膿清脉弱以大補之藥而已愈因新婚復發自用連翹消毒散致瀉痢不止竟致不救可見此證屬不足者多矣非補不可大抵便毒屬肝經初起堅硬肝主筋故也五七日後當赤軟膿成故也若尚堅硬乃元氣不能腐化往往人見堅硬只欲內消反服攻散藥多致虛虛之禍前此治者卽其驗也○一婦人兩拘腫痛小腹痞滿小便數白帶時下寒熱往來小水淋瀝余謂脾

氣滯而血病用龍膽瀉肝湯漸愈又用加味逍遙散六味丸而全愈○一婦人小腹內如有所梗兩扪並人門俱腫小便淋澁經候不調內熱作渴飲食少思腹內初如鷄卵而漸大脉洪數而虛左關尤甚屬肝膽鬱結之證也用加味歸脾湯肝火退而脾土健間以逍遙散下蘆薈丸而愈

俱薛按

楊梅瘡 六十二

楊梅瘡一證以其腫突紅爛狀如楊梅故爾名之其在西北人則名爲天泡瘡東南人又謂之廣東瘡凡毒輕而小者狀類茱萸故名茱萸瘡毒甚而大者泛爛可畏形如綿花故名綿

花瘡大都此證必由溼毒傳染而生蓋此溼穢之毒由精泄
之後氣從精道乘虛直透命門以灌衝脉所以外而皮毛內
而骨髓凡衝脉所到之處則無處不到此其爲害最深最惡
設初起時去毒不淨或治失其宜而隨至敗爛殞命者蓋不
少矣或至二三十年之後猶然發爲瘋毒或至爛頭或至爛
鼻或四肢幽隱之處臭爛不可收拾或遺毒兒女致患終身
其惡如此靜而思之則有見此惡道而不爲寒心知避者其
愚亦甚矣故凡治之之法最當知要切不可不慎也○亦有
不因溼毒傳染偶中濕熱而患者此不過在皮毛肌肉之間

清去濕熱自當全愈無足慮也

一今人每遭此患或畏人知或畏毒甚而大用攻擊峻利等藥多致邪毒未除面元氣先敗或成勞瘵或卽殞命或愈久愈甚以致敗壞不能收斂皆元氣先敗之故也余見之多矣故凡被此病者切不可驚慌亦不可專肆攻擊但按法漸解其毒務使元氣毫無損傷則正能勝邪雖毒無害若正不勝邪則微毒亦能殺人此其要也不可不察

一廣瘡治法凡其初起而元陽未傷毒亦未甚宜速用清利使從小便利去其毒惟換肌消毒散爲第一其次則五加皮飲

亦妙或兼火邪者宜秘仙方遺糧湯或稟氣多弱者宜茯苓膏丸此諸藥或十日或半月甚者一月無不見效○一凡生瘡毒者宜服槐花蕊至二三升則毒從小便泄去可免終身之患真神方也有按在下疔瘡條中○一此瘡初起時多有先下疔次便毒而後瘡出是爲一套若便毒勢甚腫痛熱秘而元氣素强者卽宜用會膿散或牡蠣散先去其毒之大勢而後用前方諸藥亦要着也○一此瘡或久而不愈或元氣素弱或因尅伐致虛但見有正不勝邪之勢則當酌其輕重或以純補元氣爲主凡脾腎陰陽氣血皆宜隨證用方但使

氣血得復則雖毒無害最忌見不真而執兩端則終歸無益
亦是要着○一飲食宜否有謂宜忌口者有謂不宜忌口者
而任其發透總之亦有其要蓋瘡毒初染毒本未甚此時只
宜清利使毒漸消爲善若食發物則愈發愈多而毒愈甚矣
此則宜忌之時也若瘡毒已久元氣已弱膿汁旣多血氣旣
耗斯時也非以藥食滋補則日見消敗何以收效此則不宜
忌者也宜忌不宜忌是亦宜補不宜補之法耳使不知辨安
能無誤○一瘡生頭面或遍身不便處欲其速愈但用點藥
則二三日可以脫落亦神妙者也但此惟治標之法耳方在

外科
新因四十二〇一瘡毒久蓄發爲瘋毒亦名楊梅癰漏或蝕筋或腐骨潰爛不收最爲惡候近來治法惟五寶丹爲最效及徐東臯楊梅癰漏方或秘傳水銀膏宜擇用之

立齋曰天泡瘡屬元氣不足邪氣所乘亦有傳染而患受證在肝腎二經故多在下體發起有先筋骨痛而後患者有先患而後痛者有瘡凸赤作痛熱毒熾甚也瘡微作痛毒將殺也瘡色白而不結痂陽氣虛也色赤而不結痂陰血虛也搔痒脉虛浮氣不相榮也搔痒脉浮數血不相榮也臀背間或頸間作痒膀胱陰虛也陰器股內作痒肝經血虛也陰囊作痒

重墜肝經陰虛濕熱也小便頻數短少色赤肝經陰虛也小便頻數短少色白脾肺氣虛也面目搔痒或變赤外邪相搏也者間痒或毛落肝膽血燥也飲食少思口乾飲湯胃氣虛也飲食不化大便不實脾氣虛也侵晨或夜間泄瀉脾腎虛也

又治法曰若表實者先用荆防敗毒散解散之○裏實者先用內疎黃連湯通導之○表裏俱實者防風通聖散雙解之○邪熱在肝經者龍膽瀉肝湯清解之○後用換肌消毒散爲主愈後再無筋骨疼痛之患氣虛者四君子湯血虛者四

物湯氣血俱虛者八珍湯俱加兼證之藥治之自無不愈○
若治失其法有蝕傷眼目腐爛玉莖拳攣肢體者但用九味
蘆薈丸以清肝火六味丸以生腎水蠲痺消毒散以養血祛
邪亦有可生者○若服輕粉等藥反收毒於內以致迭發或
槩服防風通聖散氣血愈虛因而不治者多矣○凡有腫硬
或作痛外用蒜灸及敷冲和膏內服補藥並效

一男子遍身皆患脉浮而數以荆防敗毒散治之表證乃退以
仙方活命飲六劑瘡漸愈兼飲葶薈湯月餘而愈○一男子
下部生疔諸藥不應延及遍身突腫狀似番花筋攣骨痛至

夜尤甚此肝腎二經濕熱所致先以導水丸五服次以龍膽瀉肝湯數劑再與除濕健脾之藥外貼神異膏吸其膿隔蒜灸拔其毒而愈○一童子玉莖患之延及小腹數枚作痛發熱以小柴胡湯吞蘆薈丸更貼神異膏月餘而安○一儒者患前證先玉莖作痒出水後陰囊股內小腹脇臂發小癰或乾或膿窠誤服祛風等藥肢體倦怠惡寒發熱餘食漸減大便不實脉見浮弦兩尺浮數此腎水虛熱肝木乘脾土也用六味地黃丸補中益氣湯爲主佐以換肌消毒散而愈○一人患此服攻毒等藥患處凸而色赤作痛肢體倦怠惡寒發

熱脈浮而虛此元氣復傷而邪氣實也用補中益氣湯二劑而愈○進士劉華甫患之數月用輕粉硃砂等藥頭面背臀各結一塊二寸許潰而形氣消弱寒熱口乾舌燥唇裂小便淋漓痰涎上壅飲食少思此脾胃傷諸臟弱而虛火動也先用六君子二十餘劑又用補中益氣湯加山藥山茱萸麥門五味服之胃氣復而諸證愈惟小便未清痰涎未止用加減八味丸而痊○一男子患楊梅瘡後兩腿一臂各潰二寸許一穴膿水淋漓少食無睡久而不愈以八珍湯加茯神棗仁炒服每日以蒜搗爛塗患處灸良久隨貼膏藥數日少可却

用豆豉餅灸之更服十全大補湯而愈○一婦人患之皆愈
惟兩腿兩膝各爛一塊如掌兼筋攣骨痛三載不愈諸藥不
應日晡熱甚飲食少思以葶藶湯兼逍遙散倍用茯苓白朮
數劑熱止食進貼神異膏更服八珍湯加牛膝杜仲木瓜三
十餘劑而痊○一婦人患此燃輕粉藥於被中薰之致遍身
皮塌膿水淋漓不能起居以滑石黃柏棗豆粉末等藥鋪席
上令可臥更服神功托裏散月餘而痊

俱薛按

囊癰 六十三

立齋曰囊癰屬肝腎二經陰虛濕熱下注也○腫痛未作膿者

疎肝導濕○腫硬發熱者清肝降火○已潰者滋陰托裏○
大抵此證屬陰道虧濕熱不利所致故滋陰除濕藥不可缺
常治腫痛小便秘澀者用除濕爲主滋陰佐之○腫痛已退
便利已和者除濕滋陰藥相兼用之○欲其成膿用托裏爲
主滋陰佐之候膿成卽針之仍用托裏滋陰○濕毒已盡者
專用托裏○如膿清或多或斂遲者用大補之劑及豆豉餅
炙之○若潰後虛而不補少壯者成漏老弱者不治○膿清
作渴脉大者亦不治

又法曰若小便澀滯者先用分利以泄其毒繼補陰以令其

自消○若濕熱退而仍腫痛宜補陰托裏以速其膿○膿腫而便秘者熱毒壅閉也先用托裏消毒散後用針以泄之膿去卽解○若膿去而腫痛不減者熱毒未解也用清肝益營湯○口乾而小便數者腎經虛熱也六味丸○內熱晡熱者肝經血虛也四物加參朮○體倦食少者脾氣虛熱也補中益氣湯○膿水清稀者氣血俱虛也十全大補湯○此證雖大潰而羣丸懸露治得其法旬日間肉可漸生而愈一專攻其瘡陰道益虛則腫者不能潰潰者不能斂少壯者多成痼疾老弱者多致不起○亦有患痔久漏而串及於囊者當兼

治其痔切忌寒藥尅伐虧損胃氣

馬益卿曰囊癰者濕熱下注也有作膿者此濁氣下流入滲道因陰道或虧水道不利而然膿盡自安不藥可也惟在善於調攝耳○又有因腹腫漸流入囊腫甚而囊自裂開舉丸懸掛水出以麩炭末敷之外以紫蘇包裹仰臥而養之○癰疽入囊者予嘗治數人悉以濕熱入肝經施治而用補陰佐之雖膿潰皮脫舉丸懸掛皆不死

一男子患此未作膿而腫痛以加味龍膽瀉肝湯二劑少愈更以四物湯加木通知母黃柏而愈○一男子焮腫痛甚小便

澁發熱脉數以龍膽瀉肝湯倍用車前子木通茯苓四劑勢
去其半仍以前湯止加黃栢金銀花四劑又減二三便利如
常惟一處不消此欲成膿也再用前湯加金銀花白芷皂角
刺六劑微腫痛脉滑數乃膿已成令針之腫痛悉退投滋陰
托裏藥及紫蘇末敷之而愈○一膏梁之客陰囊腫脹小便
不利此中焦積熱乘虛下注先用龍膽瀉肝湯加黃栢牛膝
四劑漸愈後用補陰八珍湯加柴胡山梔而愈後不守禁忌
前證復作仍用補陰八珍湯補中益氣湯六味丸而痊又因
勞倦發熱自用四物黃栢知母之類虛證悉具瘡口大開余

謂五臟氣血俱虛也朝用補中益氣夕用六君加當歸各五
十餘劑瘡口始斂又用六味丸調補全愈○儒者陳時用考
試不利一夕飲燒酒入房其妻不納翌日陰囊腫脹焮痛遣
人求治與以清肝火除濕熱之劑城門夜閉不及歸服翌日
報云夜來陰囊悉腐玉莖下面貼囊者亦腐此肝火挾酒毒
而濕熱熾盛也仍以前清火除濕之劑加參芪歸朮四劑腐
肉盡脫辜丸懸掛用大補氣血並塗當歸膏囊莖全復而愈
○一男子醉而入房陰囊腫脹大如斗小腹脹悶小水淋○
發熱口乾痰涎壅盛此膀胱陰虛酒毒所乘也用六味丸料

加車前牛膝作飲下滋腎丸諸證頓退再服五味麥冬一二劑而愈却以補中益氣加麥冬五味調理而瘳若全用淡滲復損真陰決致不起

俱薛按

懸癰 六十四

立齋曰懸癰謂瘡生於玉莖之後穀道之前屬足三陰虧損之證輕則爲漏瀝盡氣血而亡重則內潰而卽殞大抵此證原屬肝腎陰虛故不足之人多患之雖一於補猶恐不治况膿成而又尅伐不死何俟卽寒涼之劑亦不可過用恐傷胃氣惟製甘草一藥不損血氣不動臟腑其功甚捷最宜用之不

可忽也○焮腫或發熱者清肝解毒腫痛者解毒爲主○腫痛而小便赤澀者肝經濕熱也宜分利清肝○不作膿或不潰者氣血虛也宜補之

又治法曰凡初起濕熱腫痛或小便赤澀宜先以製甘草一

二劑及隔蒜灸更飲龍膽瀉肝湯○焮腫痛甚宜仙方活命

飲以製甘草佐之○若發熱腫痛者以小柴胡湯加車前黃

栝芎歸○若不成膿或膿成不潰者八珍湯補之○若膿已

成者急針之○已潰者用八珍湯加製甘草柴胡稍酒炒黃

栝知母○小便澀而脈有力者仍用龍膽瀉肝湯加製甘草

○小便澁而脉無力者清心蓮子飲加製甘草○膿清不斂者用大補之劑間以豆豉餅灸之久而不斂者用附子餅灸之並效○欲其生肌收斂腎虛者六味地黃丸血虛者四物加參朮氣虛者四君加芎歸脾虛者補中益氣湯氣血俱虛者八珍湯並十全大補湯若用寒涼消毒則誤矣

陳良甫曰治穀道前後生癰謂之懸癰用粉草一兩截斷以澗水浸潤灸令透內細剉用無灰酒煎服有人患此已破服兩劑瘡卽合

一弱人莖根結核如大豆許勞則腫痛先以十全大補湯去桂

加車前麥冬酒製黃栢知母少愈更服製甘草漸愈仍以四
物車前之類而消○一男子患此熯痛發熱以龍膽瀉肝湯
二劑及製甘草四劑而潰再用滋陰之劑而愈若或膿未成
以葱炒熟敷上冷卽易之隔蒜灸之亦可數日不消或不潰
或潰而不斂以十全大補湯加柴胡稍爲主間服製甘草並
效若不保守必成漏矣○一儒者患懸癰服坎離丸及四物
黃栢知母之類不應脉浮洪按之微細余以爲足三陰之虛
用托裏散及補陰八珍湯漸愈又用六味丸補中益氣湯調
補化源半載而痊大凡瘡瘍等證若腎經火氣亢盛致陰水

不能生化而患陰虛發熱者宜用坎離丸取其苦寒能化水中之火令火氣衰而水自生若陽氣衰弱致陰水不能生化而患陰虛發熱者宜用六味丸取其酸溫能生火中之水使陽氣旺而陰自生况此證屬腎經精氣虧損者十有八九屬腎經陽氣亢盛者十無一二然江南之人患此者多屬脾經陰血虧損元氣下陷須用補中益氣湯升補陽氣使陽生而陰長若嗜慾過多虧損真陰者宜用六味丸補腎經元氣以生精血仍用補中益氣湯以培脾肺之生氣而滋腎水經云陰虛者脾虛也但多誤認爲腎經火證用黃柏知母之類復

傷脾肺絕其化源反致不起惜哉○通府張敬之患前證久
不愈日晡熱甚作渴煩而喘或用四物湯黃栢知母之類病
益甚肢體倦少食大便不實小便頻數謂余曰何也余曰此
脾虛之證前藥復傷而然遂用補中益氣加茯苓半夏數劑
飲食漸進前證漸愈更加麥冬五味調理乃痊經曰脾屬太
陰爲陰土而主生血故東垣云脾虛元氣下陷發熱煩渴肢
體倦怠等證用補中益氣湯以升補陽氣而生陰血若誤認
爲腎虛火盛而用四物黃栢知母之類反傷脾胃生氣是虛
其虛矣况黃栢知母乃瀉陽損陰之劑若非膀胱陽火盛而

不能生陰水以致發熱者不可用也

俱薛按

脫疽 六十五

立齋曰脫疽以疔患於足或足趾重者潰脫故名之亦有患於手指者名曰蛇節疔重者腐去本節輕者筋攣此證因膏粱厚味酒麪炙煨積毒所致或不慎房勞腎水枯竭或服丹石補藥致有先渴而後患者有先患而後渴者皆腎水虧涸不能制火也此證形勢雖小其惡甚大不問腫潰皆須隔蒜灸之不痛者宜明灸之庶得少殺其毒凡初發而色黑不潰者不治毒延入腹者不治色黑不痛者亦不治色赤作痛自潰

者可治若失解其毒以致肉死色黑者急斬去之亦有因修
手足口咬等傷而致者若元氣虛弱或犯房事或外塗寒涼
內服尅伐損傷脾胃以致患處不潰或黑延上足亦多致死
重者須當用脚刀轉解周骨輕拽去之使筋隨骨出而毒得
洩亦不痛否則毒筋內斷雖去而仍潰且偏僻之處氣血罕
到藥難導達况攻毒之劑必先傷脾胃又損元氣不若灸法
爲良重者須解去爲善故孫真人云在肉則割在指則截使
不如此則必致夭歿而害尤甚矣况患處已壞雖解不痛又
何憚而不爲乎患者當知之○若女人患此又多因札縛血

脈不通遂成死肉惟當壯其脾胃行其經絡生其血氣則愈
又治法曰色赤作痛者元氣虛而濕毒壅盛也先用隔蒜灸
更用解毒藥如活命飲托裏散之屬仍速用補劑如十全大
補湯加減八味丸則毒氣不致上侵元氣不致虧損庶可保
生○作渴者宜滋陰降火色黑者不治

崔氏方治手足甲疽或因修甲傷肉或因損足成瘡潰爛上脚
用綠礬置鐵板上煨沸色赤如溶金色者爲真沸定取出研
末以鹽湯洗而搽之

一男子足指患之焮痛色赤發熱隔蒜灸之更以人參敗毒散

去桔梗加金銀花白芷大黃二劑痛止又用十宣散去桔梗
官桂加天花粉金銀花數劑而痊○一男子足指患之色紫
不痛隔蒜灸五十餘壯尚不知痛又明灸百壯始痛更投仙
方活命飲四劑乃以托裏藥潰脫而愈○一膏梁之人先作
渴足熱後足大指赤痛六脉洪數而無力左尺爲甚予謂此
足三陰虛證當滋化源爲主彼固服除濕敗毒等劑元氣益
虛色黯延足余乃朝用補中益氣湯夕用補陰八珍湯各三
十餘劑及桑枝灸潰而濃清作渴不止遂朝以前湯送加減
八味丸夕用十全大補湯三十餘劑而痊是時同患此證服

敗毒之藥者俱不救○一膏梁人年踰五十亦患此色紫黑
脚焮痛喜其飲食如故動息自寧爲瘡瘍之善證尚可治遂
以連翹消毒散六劑更以金銀花甘草節瓜萋二十餘劑患
指潰脫再以當歸川芎連翹生地金銀花白芷二十餘劑而
愈○一荔蕘左足指患一泡麻木色赤次日指黑五日其足
黑冷不知疼痛脉沉細此脾胃受毒所致以飛龍奪命丹一
服翌日令割去足上死肉割後骨始痛而可救遂以十全大
補湯治之而愈蓋死肉乃毒氣盛而拒絕營氣所致况至陰
之下氣血難達經曰風淫木疾卽此是也向若攻伐之則元

氣愈虛邪氣愈盛乘虛上侵必致不救

俱薛按

脚發 六十六

立齋曰脚發之證屬足三陰精血虧損或足三陽濕熱下注若色赤腫痛而潰膿者屬濕熱下注爲可治若色微赤微腫而膿清者屬精血虧損爲難治若黑黯不腫痛不潰膿煩熱作渴小便淋漓者陰敗末傳惡證也爲不治○治法濕熱下注者先用隔蒜灸活命飲以解壅毒次服益氣湯六味丸以補精氣若色黯不痛者着肉灸桑枝灸以行壅滯助陽氣更用十全大補湯八味丸以壯脾土滋化源多有復生者若專治

其瘡復傷生氣吾未見其生者

閣老靳介菴脚指縫作痒出水腫焮脚面敷止痒之藥不應服

除濕之藥益甚余以爲陰虛濕熱下注用六味地黃丸補中

益氣湯而愈○大叅李北溪左足赤腫作痛此足三陽經濕

熱下注先用隔蒜灸與活命飲一劑其痛頓止灸患處出水

赤腫頓消次用托裏消毒散四劑灸患處出膿而愈○一儒

者患此腫硬色白兩月餘矣此足三陰虧損爲外寒所侵也

用大防風湯及十全大補湯兼服而消後塲屋不利飲食勞

倦前證復作盜汗內熱飲食不化便滑肌瘦此脾土虛寒而

命門火不能相生用八味丸益氣湯百餘劑喜其年壯得愈
○一男子脚心發熱作渴引飲或用四物芩連知柏之類腹
痛作嘔煩熱大渴此足三陰虧損前藥復傷脾胃也先用六
君加炮薑數劑而脾胃醒再用補中益氣加茯苓半夏而脾
胃健乃以加減八味丸兼服半載而愈○一儒者脚心發熱
作痒以滾湯浸漬而出水肌體骨立作渴吐痰此脾腎虛而
水泛爲痰也服益氣湯六味丸年餘元氣復而諸證愈

俱薛
按

足跟瘡

六十七

立齋曰足跟乃督脉發源之所腎經所過之地若飲食失節起

居失宜虧損足三陽經則成瘡矣○若漫腫寒熱○體倦少
食屬脾虛下陷也用補中益氣湯○若晡熱作痛頭目不清
屬脾虛陰火也前湯並六味丸○若痰涎上升或口舌生瘡
屬腎水乾涸也前湯並加減八味丸○凡此皆當滋其化源
若治其外則誤矣俗云鬼嚙瘡者蓋獵人被鬼咬脚跟或瘡
久而不斂必氣血瀝盡而死若人脚跟患此亦終難愈因名
鬼嚙也

一男子素不慎起居內熱引飲作渴體倦兩足發熱後足跟作
痛或用清熱除濕之劑更加發腫又服敗毒之藥焮赤痛甚

復用清熱祛毒潰裂番張狀如赤榴熱痛如錐內熱晡熱此
以足三陰虧損朝用十全大補湯夕用加減八味丸外敷當
歸膏兩月餘而愈其服消毒等藥而效者不能枚舉○太尹
陳汝鄰兩腿酸軟或赤或白足跟患腫或痛或痒後痛而或
如無皮或如皴裂日晡至夜脹痛歛熱用補中益氣湯加八
味丸料補其肝腎而愈○一男子患足跟瘡腫痛服消毒散
搽追蝕藥虛證疊出形體骨立自分必死余用十全大補湯
兼山藥山茱萸兩月餘而愈○一婦人兩足發熱兩跟作痛
日晡熱甚余以爲肝腎血虛用加味道遙散六味地黃丸五

十餘劑而愈○楊錦衣脚跟生瘡如豆許痛甚狀似傷寒以
還少丹內塞散治之稍可次因納寵作痛反服攻毒藥致血
氣愈弱腿膝痿弱而死蓋足跟乃二蹻發源之處腎經所由
之地若瘡口不合則蹻氣不能發生腎氣由此而泄故爲終
身之疾况彼瘡先得於虛復不知戒雖大補氣血猶恐不及
安可服暴悍攻毒之藥以戕賊之乎

俱薛按

腎藏風瘡

六十八

立齋曰腎藏風屬腎虛風邪乘於廉脛以致皮膚如癬或漸延
上腿久則延及遍身外證則搔痒成瘡膿水淋漓眼目昏花

內證則口燥舌乾腰腿倦怠吐痰發熱盜汗體疲治法用六味丸爲主佐以四生散若脾胃虛弱者用補中益氣湯爲主佐以六味丸四生散爲善

欽天薛循齋年六十有一兩賺患之膿水淋漓發熱吐痰四年矣此腎藏風證也與六味丸四生散而瘥年餘復作延及遍身日晡益甚痰渴盜汗唇舌生瘡兩目昏赤皆腎經虛火而水泛爲痰也用加減八味丸而愈三年後小便淋瀝莖中澁痛此思色精不出而內敗也用前丸及補中益氣湯加麥門

五味而愈

薛按

一凡腎囊濕痒抓破成瘡俗名腎上風也外治之法但以黃丹
枯礬生牡蠣共爲末搽擦卽愈或以蛇床子同白礬煎湯洗
之亦可

廉瘡 六十九

立齋曰廉瘡生於兩廉初起赤腫久而腐潰或津溼搔痒破而
膿水淋漓蓋因飲食起居虧損肝腎或因陰火下流外邪相
搏而致外廉屬足三陽濕熱可治內廉屬足三陰虛熱難治
○若初起惡寒壯熱焮腫作痛者屬濕熱用栝蘇散○若漫
腫作痛或不腫不痛者屬陰虛用補陰八珍湯若膿水淋漓

體倦食少內熱口乾者屬脾虛用補中益氣湯加茯苓酒炒
白芍藥○若午後熱或作痛頭目不清者屬陰火前湯加酒
炒黑黃柏及六味地黃丸○若午後發熱至子時方止是血
虛前湯加芍歸熟地○若鬱結傷脾而甚者用歸脾湯加柴
胡山梔○若怒動肝火而甚者用補中益氣湯加川芎山梔
黃芩○若內熱口乾肢體倦怠或痰涎上升或口舌生瘡屬
脾腎虛熱用六味地黃丸補中益氣湯○若患處黑黯肢體
畏寒飲食少思屬脾腎虛敗用八味地黃丸若誤用攻伐復
損胃氣絕其化源治亦難矣

鴻臚翟少溪兩膝生瘡漸至遍身發熱吐痰口燥咽乾盜汗心
煩溺赤足熱日晡益甚形體日瘦此腎經虛火也用六味丸
不一月諸證悉退三月元氣平復○陳湖陸懋誠素因陰虛
過飲入房發熱腿痛似膝瘡用發表之劑兩腿腫黯執氣如
霧欲發瘰脉皆洪數兩尺尤大余曰屬足三陰虛酒濕所乘
元氣損而邪益甚耳用十全大補加山藥山茱萸附子一劑
脉證頓退却去附子又二劑全愈

薛按

天泡瘡

七十

天泡瘡形如水泡皮薄而澤或生頭面或生遍身乃太陰陽明

風熱所致故見於皮毛肌肉之間宜清血涼血執解則愈如
兼表邪而發熱脈數者宜荆防敗毒散如火盛者或加芩連
連翹金銀花玄參之屬如焮腫疼痛脈數便結者此表裏俱
實也宜防風通聖散雙解之如外多毒水以金黃散敷之無
有不愈

赤白遊風

七十一

立齋曰赤白遊風屬脾肺氣虛腠理不密風熱相搏或寒閉腠
理內熱拂鬱或因虛火內動外邪所乘或肝火血熱風熱所
致治法若風熱用小柴胡湯加防風連翹○血熱用四物湯

加柴胡山梔丹皮○風熱相搏用荆防敗毒散○內熱外寒
用加味羌活湯○胃氣虛弱用補中益氣傷加羌活防風及
消風散○血虛用加味逍遙散○陰虛逍遙散六味丸○肝
腎虛熱用六味丸則火自息風自定痒自止若用祛風辛熱
之劑則肝血愈燥風火愈熾元氣愈虛腠理不閉風客內淫
腎氣受傷相火翕合血隨火耗反爲難治矣

一男子秋間發疔瘡此元氣虛而外邪所侵也先用九味羌活
湯二劑又用補中益氣加羌防而愈後不慎起居盜汗晡熱
口乾唾痰體倦懶言用補中益氣湯加減八味丸而愈○一

婦人身如丹毒搔破膿水淋漓熱渴頭暈日晡益甚用加味
逍遙散而愈○一女子赤暈如霞作痒發熱用加味小柴胡
湯加生地連翹丹皮而愈

俱薛按

翻花瘡

七十二

立齋曰翻花瘡者由瘡瘍潰後肝火血燥生風所致或瘡口齩
肉突出如菌大小不同或出如蛇頭長短不一治法當滋肝
補氣外塗藜蘆膏齩肉自入須候元氣漸復膿毒將盡塗之
有效不然雖入而復潰若誤用刀針蝕藥灸火其勢益甚或
出血不止必致寒熱嘔吐等證須大補脾胃爲善

判官張承恩內股患癰將愈翻出一肉如菌余曰此屬肝經風熱血燥當清肝熱養肝血彼爲不然乃內用隆火外用追蝕蝕而復翻翻而復蝕其肉益大元氣益虛始信余言遂內用梔子清肝散外用藜蘆膏而痊○一上舍素膏梁善怒耳下結一核從潰而瘡口翻張如菌焮連頭痛或胸脇作脹或內熱寒熱或用清熱消毒之藥年餘未瘥余用補中益氣湯六味地黃丸而尋愈○一男子背瘡斂如豆許翻出肉寸餘用消蝕割繫法屢去屢大此肝經血虛風熱余用加味逍遙散三十餘劑塗藜蘆膏而消又用八珍湯倍用參芪歸朮而斂

○一婦人素善怒臂患癰瘡口出肉長二寸許此肝腎鬱怒氣血虛而風內動也用加味逍遙散塗黎蘆膏而愈後因怒患處脹悶遍身汗出如雨此肝經風熱風能散氣故耳仍用前散並八珍湯而愈

俱薛按

痔漏 七十三 附臟毒下血按

丹溪云漏瘡須先服補藥以生氣血卽參芪歸朮芎大劑爲主外以泡附子爲末唾津和爲餅如三錢厚安瘡上以艾炷灸之漏大艾炷亦大漏小艾炷亦小但灸令微熱不可令痛乾則易之如困則止來日如前再灸直至肉平爲效亦有用附

片灸之以補氣血藥作膏貼之

立齋曰痔屬肝脾腎三經凡陰精虧損者難治多成漏證若肺與大腸二經風熱濕熱者熱退自愈若不守禁忌者亦成漏證此因醉飽入房筋脉橫解精氣脫泄熱毒乘虛流注或淫極強固其精以致木乘火勢而侮金或灸燻厚味過多或勞傷元氣陰虛火熾皆成斯疾○若破而不愈卽成漏矣有串臀者有串陰者有串腸者有穢從瘡口而出者形雖不同治頗相似○其腸頭腫成塊者濕熱也作痛者風熱也大便秘結者火也潰而爲膿者熱勝血也當各推其所因而治之

治法曰凡初起燉痛便秘小便不利者宜清熱涼血潤燥疎
風○若氣血虛而爲寒涼傷損者宜調養脾胃滋補陰精○
大便秘澁或作痛者潤燥除濕○肛門墜痛者瀉火導濕○
下墜腫痛而痒者祛風勝濕○小便澁滯腫痛者清肝導濕
○其成漏者養元氣補陰精爲主○大凡痔漏下血服涼血
藥不應者必因中氣虛不能攝血非補中升陽之藥不能愈
切忌寒涼之劑○亦有傷濕熱之食成腸癖而下膿血者宜
苦寒之劑內疎之○脈弦絕澁者難治滑大柔和者易治○
經云因而飽食筋脈橫解腸澼爲痔其屬肝脾腎也明矣若

有患痔而兼疝患疝而兼下疳皆屬肝腎不足之變證但用地黃丸益氣湯以滋化源爲善若專服寒涼治火者無不致禍

一男子患痔成漏每登廁則痛以秦艽防風湯加條芩枳殼四劑而愈以四物加升麻芩連荆防不復作○一男子患痔漏每登廁則肛門下脫作痛良久方收以秦艽防風湯數劑少愈乃去大黃加黃芪川芎芍藥而痛止更以補中益氣湯二十餘劑後再不脫○一儒者膿血淋漓口乾作渴晡熱便血自汗盜汗余謂此肝腎陰虛也不信仍服四物芩連知栢之

類食少瀉嘔余先用補中益氣湯加茯苓半夏炮薑脾胃漸醒後用六味丸朝夕服兩月餘諸證悉愈○一男子患此服寒涼之劑侵晨去後不實食少體倦口乾作渴小腹重墜余用補中益氣湯而下墜頓止用四神丸而食進便實用地黃丸而瘡尋愈

俱薛按

一男子臟毒下血服涼藥敗毒藥不惟不能止且飲食日減肢體愈倦脉數而澁先以補中益氣湯數劑少止更以六君子湯加升麻炮薑四劑而止乃去炮薑加芎歸月餘脾胃亦愈嘗治積熱成風下血者先以敗毒散散之胃寒氣弱者用四

君子湯或參苓白朮散補之並效○一男子臟毒下血脾氣
素弱用六君子湯加芎歸枳殼地榆槐花治之而愈後因謀
事血復下諸藥不應余意思慮傷脾所致遂投以歸脾湯四
劑而痊大抵此證所致之由不一當究其因而治之丹溪云
芎歸湯一劑乃調血之上品熱加赤茯苓槐花冷加白茯苓
木香此則自根自本之論也雖然血氣出於穀氣故大腸下
血以胃藥收功宜四君子湯或參芪白朮散以枳殼散小烏
沉湯和之胃氣一回血自循經絡矣○凡腸風者邪氣外入
隨感隨見臟毒者蘊積毒久而始見○又云人惟坐臥風濕

醉飽房勞生冷停寒酒麵積熱以致營血失道滲入大腸此
腸風臟毒之所由作也挾熱下血者清而色鮮挾冷下血者
濁而色黯清則爲腸風濁則爲臟毒先便而後血者其來遠
先血而後便者其來近治法大要先當解散脾胃風邪熱則
敗毒散冷則不換金正氣散加川芎當歸後隨其冷熱治之

○一婦人素患痔漏每因熱則下血數滴以四物湯加黃連
治之卽愈後爲大勞瘡發腫痛經水不止脈洪大無力此勞
傷血氣火動而然也用八珍湯加芩連蒲黃二劑而止後去
蒲黃芩連加地骨皮數劑而安丹溪曰婦人崩中者由藏府

傷損衝任二脉血氣俱虛故也若勞動過極臟腑俱傷以致衝任氣虛不能約制經血故忽然而下謂之崩中暴下治宜大補氣血之藥舉養脾胃微加鎮墜心火之劑以治其心補陰瀉陽經自正矣 俱薛按

一論外通用方

枯痔水澄膏

外二百三十

如神千金方

外二二二一

三品錠子

外二二二四

羊膽膏

外二二二五

熊膽膏

外二二二七

水銀棗子膏

外二二二六

蝸牛膏

外二二二八

一方 凡痔瘡初起痛痒不止以舊布鞋底烘熱頻頻熨之冷則再烘再熨其痛痒則止

一灸法

命門灸七壯治五種痔漏○長強灸隨年壯治五痔便血最效

一法 治痔疾大如胡瓜貫於腸頭發則疼痛僵仆先以荆芥湯洗之次以艾灸其上三五壯若覺一道熱氣貫入腸中必大瀉鮮血穢血一時許覺痛甚後其疾乃愈

跌打損傷 七十四

凡跌打損傷或從高墜下惡血流於內不分何經之傷皆肝之所主蓋肝主血也故凡敗血凝滯從其所屬而必歸於肝多在脇肋小腹者皆肝經之道也若其壅腫痛甚或發熱自汗皆當酌其虛實而以調血行經之藥治之

一脈法如內經曰肝脈搏堅而長色不青當病墮若搏因血在脇下令人嘔逆○金匱云寸口脈浮微而澁然當亡血若汗出設不汗出者當身有瘡被刀斧所傷亡血故也○脈經云金瘡出血太多其脈虛細沉小者生浮數實大者死○砍刺出血不止其脈來大者七日死滑細者生○從高顛仆內有

瘀血腹脹脉堅強者生小弱者死○破傷有瘀血在內者脉
堅強實則生虛小弱則死○若血亡過多者脉細小則生浮
大數實則死皆爲脉病不相應故也

一治法凡胸滿脇脹者宜行血○老弱者宜行血活血○腹痛
者宜下血○瘀肉不潰或潰而不斂宜大補氣血○若打撲
墜墮稍輕別無瘀血等證而疼痛不止者惟和氣血調經脉
其痛自止更以養氣血健脾胃則無有不效○亦有痛傷胃
氣作嘔或不飲食者以四君子湯加當歸砂仁之類調之○
若有瘀血不先消散而加補劑則成實實之禍設無瘀血而

妄行攻利則致虛虛之禍故凡治此證須察所患輕重有無
瘀血及元氣虛實不可槩行攻下致成敗證蓋打撲墜墮皮
肉不破肚腹作痛者必有瘀血在內宜以復元活血湯攻之
老弱者四物湯加紅花桃仁川山甲補而行之若血去多而
煩燥此血虛也名曰亡血宜補其血如不應當以獨參湯補
之○一凡損傷不問老弱及有無瘀血停積俱宜服熱童便
以酒佐之推陳致新其功甚大若脇脹或作痛或發熱煩燥
口乾喜冷惟飲熱童便一甌勝服他藥他藥雖亦可取效但
有無瘀血恐不能盡識反致誤人惟童便不動臟腑不傷氣

血萬無一失嘗詢之諸營操軍常有墜馬傷者何以愈之俱
對曰惟服熟董便卽愈此其屢試之驗亦明矣然惟胃虛作
嘔及中寒泄瀉者不可服○大凡腫痛或傷損者以葱搗爛
炒熱菴之或用生薑葱白同搗爛和麩炒熱菴之尤妙或用
生薑陳酒糟同搗爛炒熱菴之亦可○外治損傷諸方如秘
傳正骨丹沒藥降聖丹當歸導滯散黑丸子本事接骨方十
味沒藥丸洗損傷等十餘方俱有妙用所當詳察

立齋曰予於壬申年被重車碾傷悶瞢良久復蘇胸滿如築氣
息不通隨飲熟董便一碗胸寬氣利惟小腹作痛吾鄉銀臺

徐東濠先生與復元活血湯一劑便血數升腫痛悉退更服
養血氣藥而痊○戊辰年公事居庸見覆車被傷者七八人
仆地呻吟一人未蘇予俱令以熱童便灌之皆得無事

杖瘡 七十五

杖瘡一證凡其甚者必以瘀血爲患血瘀在外者淺則破之深
則刺之內潰者開之腐肉者取之血瘀在內者宜以活血流
氣之藥和之甚者利之行之此治血凝之法也然其受刑之
時號叫則傷氣忍痛則傷血悲憤則傷志血氣情志俱傷虛
所必至若不培補則羸困日甚矣况脾主肌肉脾氣受傷則

飲食必減血脉損壞則肌肉俱病故凡既傷之後但察其虛
多滯少者則宜以參芪歸朮熟地甘草之屬專理脾氣以托
氣血脾健則元氣日復肌肉自生可保無虞矣其有傷筋骨
而作痛者宜沒藥降聖丹治之若牙關緊急或腰背反張者
以玉真散治之並效總之此證宜先察其有瘀無瘀及形氣
虛實酌而治之凡諸變證治法有未盡者宜與前跌打損傷
條互參通用○外杖瘡四方見外科方中

文刑部用晦伏 鬪諫南巡受杖瘀血已散壞肉不潰用托裏
之藥稍潰而膿清此氣血虛也非大劑參芪不能補文君亦

善醫以爲恐腹滿予強之而飲食稍思遂加大補劑飲食日
進肉潰膿稠而愈○又治江翰林諸公與文同事者九人皆
先散其瘀血漸用排膿托裏之藥俱愈○夏鳳北京人因杖
瘡臀膝通潰膿瘀未出時發昏憤此膿毒內作而然也急與
開之昏憤愈甚此虛也以八珍湯一服少可數服死肉自腐
頓取之令用猪蹄湯洗淨以神效當歸膏塗貼再以十全大
補湯兩月而愈若更投破血之劑則危矣

薛按

破傷風

七十六

病機云破傷風者有因卒暴傷損風寒襲之傳播經絡致使寒

熱更作身體反張口噤不開甚者邪氣入臟○有因諸瘡不
瘥營衛俱虛肌肉不生瘡眼不合邪亦能外入於瘡爲破傷
風之候○有諸瘡不瘥舉世皆言著灸爲上是爲熱瘡而不
知火熱客毒逐經爲變不可勝數微則發熱甚則生風而搐
或角弓反張口噤目斜○亦有破傷不灸而病此者因瘡着
白痂瘡口閉塞氣難通泄故陽熱易爲鬱結熱甚則生風也
徐用誠曰此論所因有四二者因瘡口入風似屬外因一者因
灸生熱似屬不內外因一者因瘡口閉塞內熱生風似屬內
因也○又云破傷風證古方藥論甚少豈非以此疾與中風

同論故不另立條目也惟河間論與傷寒表裏中三法同治
其言病因有因外傷於風者有因灸者有因內熱所作者然
與中風相似也但中風之人尚可淹延歲月而破傷風者犯
之多至不救蓋中風有在經在府在臟之異獨入臟者最難
治破傷風或始而出血過多或瘡早閉合瘀血停滯俱是陰
虛受病乃五臟之所主故此風所傷始雖在表卽隨必傳入
臟故多死也此病或因瘡口坦露或因瘡口閉密皆能爲之
若病已十分安全而忽有此大抵皆由內氣虛而有鬱熱者
乃得之若內氣壯實而無鬱熱者雖害而無所害也

立齋曰大法破傷中風風熱燥甚怫鬱在表而裏氣尚平者必
善伸數欠筋脉拘急時或惡寒或筋惕而播脉浮數而弦皆
表證也宜以辛熱治風之藥開散結滯是與傷寒表熱怫鬱
而以升麻湯辛熱發散者同也然凡用辛熱開其風熱結滯
者宜以寒藥佐之則免其藥雖中病而風熱轉甚也如治傷
寒發熱用麻黃桂枝而加黃芩知母石膏之類是也若近世
以甘草滑石葱豉寒藥發散甚妙○若表病不已漸傷入裏
裏又未太甚而脉在肌肉者宜以退風熱開結滯之寒藥調
之或微加治風辛熱亦得猶傷寒在半表半裏而以小柴胡

和解之意也○若裏熱已甚而舌強口噤項背反張驚搐惕
搦涎唾稠粘胸腹滿塞或便溺閉結或時汗出脉洪數而弦
然出汗者由風熱甚於裏而表邪已罷腠理疎泄心火內盛
故汗出也法宜除風散結以寒藥下之後用退風熱開鬱滯
之寒藥調之熱退結散則風自愈矣○凡治此者亦宜用按
摩導引之法及以藥幹開牙關勿令口噤使粥藥得下也

一婦人臀癰將愈患破傷風發熱搐搦脉浮數予以當歸地黃
湯治之彼不信乃服發散敗毒藥果甚始信而服之數劑而
痊○一男子背瘡未痊斂以膏藥剪孔貼之患破傷風證而

歿此先失於內補外邪襲其虛耳余見此證貼膏藥剪孔欲
其通氣而反患破傷風搽斂藥生肌欲其收口而反助餘毒
以致歿者多矣可不慎哉

薛按

一破傷風通用方

菴蓂酒 外二五六

防風湯 外二五六

蜈蚣散 外二六四

大苧黃湯 外二六一

羌活湯 外二五九

白朮防風湯 外二五八

玉真散 外二六二

敷藥 外二五五

養血當歸地黃湯 外二六三

類破傷風 七十七

立齋曰大凡癰疽潰後筋糜肉爛膿血大泄陽隨陰散或筋脉拘急惡寒惕擗甚者舌強口噤項背反張痰涎壅盛便閉汗出不時發熱此氣血俱虛而變見若此雖與破傷風相類而主治之法但當大補血氣若果有風證亦須以大補氣血爲主而兼以治風之藥設若不審是非而妄藥之則誤矣

司徒邊華泉肩患癱而發熱目直或瞶殊類中風日晡熱甚脉益數此足三陰氣血虧損虛火妄動也用參芪歸朮炙甘草加酒炒黑黃柏五味麥冬肉桂四劑而愈又數劑而斂○一

儒者患腿癰深蓄於內肉色不變久不穿潰針出膿瘀五碗許惡證駢臻全類中風此脾胃虛而變證也用六君子湯加當歸炮薑及聖愈湯各四劑而安又勞心不寐用歸脾湯而愈

薛按

班疹丹毒 七十八

班疹一證雖已有正門詳載然彼以小兒麻醋爲言其有非麻醋而無論大人小兒忽患班疹小瘡者此雖與彼相類而實有小異也是亦不可不辨而治之蓋多由風熱外感之證耳治此之法脉浮而身執有表證者惟散風邪爲主脉浮而數

者祛風兼清熱脈沉滑而無表證者清火爲主脈浮沉俱滑數而表裏兼見者宜表裏雙解之然惟小兒多有此證須察其表裏虛實酌而治之可也總之小兒脆弱宜安裏之藥多攻發之藥少秘則微泄之結則微導之但令邪氣不壅而散之易則證輕而兒自安矣大抵身溫煖者順身涼者逆

王海藏曰前人云首尾俱不可下者何也曰首不可下者爲斑未見於表下則邪氣不得伸越此脈證有表而無裏故禁首不可下也尾不可下者爲斑毒已顯於外內無根蒂大便不秘本無一切裏證下之則斑氣陷逆故禁尾不可下也

潔古曰班疹之病其爲證各異發焮腫於外者屬少陽三焦相
火也謂之班小紅壓行皮膚之中不出者屬少陰君火也謂
之疹凡見班證若自吐瀉者多吉慎勿亂治謂邪氣上下俱
出也若班疹並出者其邪必甚小兒難勝是以多生別證也
然首尾皆不可下

立齋曰凡小兒丹毒遍身俱赤不從砭治以致毒氣入腹則不
救蓋此證乃惡毒熱血蘊蓄於命門遇相火而合起也如霞
片者須砭去惡血爲善如腫起赤色遊走不定者宜先以生
麻油塗患處砭之以洩其毒凡從四肢起入腹者不治雖云

丹有數種治有數法無如砭之爲善常見患稍重者不用砭法俱不救

一婦人患斑作痒脉浮以消風散四劑而愈○一婦人患斑作痒脉浮數以人參敗毒散二劑少愈更以消風散四劑而安○一男子患斑色赤紫焮痛發熱喜冷脉沉實以防風通聖散一劑頓退又以荆防敗毒散加芩連四劑而愈○一老人患疹色微赤作痒發熱以人參敗毒散二劑少愈以補中益氣湯加黃芩山梔而愈○一小兒患疹發熱作痛煩渴欲以清涼飲下之診其脉不實舉指不數此邪在經絡也不可下

遂以解毒防風湯二劑而愈此證小兒多患之須詳審在表在裏及邪之微甚而治之○一兒作痒發熱以犀角散一劑作吐瀉此邪氣上下俱出也毒必自解少頃吐瀉俱止其疹果消吐瀉後脉見七至此小兒和平之脉也邪已盡矣不須

治果愈

俱薛按

一男子患丹毒焮痛便秘脉數而實服防風通聖散不應令砭患處去惡血仍用前藥而愈○一小兒腿患丹如霞遊走不定先以麻油塗患處砭出惡血毒即漸散更以神功托裏散一劑而安○一小兒患丹毒外勢雖輕內則大便不利此患

在臟也服大連翹飲敷神功散而瘥○一小兒遍身皆赤疔
之投解毒藥而愈○嘗治小兒丹毒便秘或煩躁者服五福
化毒丹亦效 俱薛按

一白虎丹方治在外科方二九二

瘤贅 七十九

立齋曰內經云肝主筋而藏血心裹血而主脉脾統血而主肉
肺司腠理而主氣腎統骨而主水○若怒動肝火血涸而筋
攣者自筋腫起按之如筋久而或有赤縷名曰筋瘤若勞役
火動陰血沸騰外邪所搏而爲腫者自肌肉腫起久而有赤

全書卷四十一
外和
九
附

縷或皮俱赤者名曰血瘤若鬱結傷脾肌肉消薄外邪所搏而爲腫者自肌肉腫起按之實軟名曰肉瘤若勞傷肺氣腠理不密外邪所搏而壅腫者自皮膚腫起按之浮軟名曰氣瘤若勞傷腎水不能榮骨而爲腫者自骨腫起按之堅硬名曰骨瘤夫瘤者留也隨氣凝滯皆因臟腑受傷氣血乖違當求其屬而治其本○大凡屬肝膽二經結核宜八珍加山梔膽草以養氣血清肝火六味丸以養肺金生腎水○若屬肝火血燥須生血涼血用四物二地丹皮酒炒黑膽草山梔○若中氣虛者補中益氣湯兼服之○若治失其法脾胃虧損

營氣虛弱不能濡於患處或寒氣凝於瘡口營氣不能滋養於患處以致久不生肌而成漏者悉宜調補脾氣則氣血壯而肌肉自生矣若不慎飲食起居及七情六淫或用寒涼蝕藥蛛絲纏芫花線等法以治其外則誤矣

按瘤贅一證如前薛論已盡其畧然此五瘤之外又惟粉瘤爲最多蓋此以腠理津沫偶有所滯聚而不散則漸以成瘤是亦粉刺之屬但有淺深耳深者在皮裏則漸大成瘤也余嘗聞之先輩曰瘤贅旣大最畏其破非成膿者必不可開開則牽連諸經漏竭血氣最難收拾無一可活及詳考薛按所載

數人凡其潰破者皆至不治誠信然也不可不知○茲紀子
於三旬之外忽於臀下肛門前骨際皮裡生一小粒初如菜
豆許不以爲意及半年而如黃豆矣又一年而如皂子復如
粟矣此時乘馬坐椅皆有所碍而漸至痛矣然料此非敷藥
可散又非煎藥可及使其日漸長大則如升如斗懸掛腰股
間行動不便豈不竟成廢物乎抱憂殊甚謀之識者皆言不
可割刺恐爲禍不小予孰籌數月莫敢妄動然竊計此時乘
小不取則日後愈大愈難矣將奈之何嘗見人臀股間受箭
傷者未必卽死此之利害不過如是遂決意去之一日飲酒

微醺乘醉以柳葉針刺之所出者皆如豆腐白皮之屬蓋卽粉瘤也刺後頓消予甚快然及兩日後則腫如熱癰予以會通膏貼三日膿潰而愈予又快然不兩日又腫起更熱更大

予則大懼大悔謂瘤贅誠不可刺也然而無奈復以會通膏貼之又三日而大潰則潰出一囊如魚胞者然後收口全愈今愈後數十年此間仍有一小竅誠險證也向非予之勇決則此後不知作何狀使開之再遲則真有不可收拾矣是以病不早治則不知所終此亦可爲治病者之鑑

新按

一刺灸法向一人於眼皮下弦生一小瘤初如米粒漸大如豆

其人疑畏求治於外科彼用攢針三四枚翻轉眼皮刺其內膜少少出血如此二三次其瘤日縮竟得盡消○又一人於手臂上生一瘤漸大如龍眼其人用小艾於瘤上灸七壯竟爾漸消不長亦善法也或用隔蒜灸之亦無不可○一凡於不便處有生此物者當以此二法酌宜用之大都筋病宜灸血病宜刺或有以蘿蔔子南星樸硝之類敷而治者亦可暫消若欲拔根無如前法

一蛛絲纏法可治瘤贅未甚大者其法最妙予嘗見一人於腹上生一瘤其大如胡桃一治者取珠絲撚成粗線纏札其根

數日其絲漸緊痛根漸細屢易屢細不十日竟爾脫落誠竒法也。可見諸線日鬆惟蛛絲日緊物理之妙有當格致者如此。然亦纏治宜早。若形勢既大恐不宜也。

薛氏按曰：一男子左腿外側近臀腫一塊，上有赤縷三年矣。飲食起居如常，觸破湧出膿血，發熱惡寒。此膽經受證，故發於腿外側。診其脉左尺洪數，左關弦洪。此腎水不能生肝木，用補中益氣湯六味地黃丸而痊。○一男子小腹患之膿水淋漓，此足三陰之證，用補中益氣加麥門五味以培脾土，用六味地黃丸以生腎水，更用蘆薈丸以清肝火而斂。○一老儒

眉間患之三年其狀如紫桃下墜蓋目按之如水囊此肝脾
之證膿瘀內潰而然耳遂刺出血膿目卽開以炒黑膽草山
梔芎歸芍藥柴胡白朮茯苓等藥而愈

疣 八十

立齋曰疣屬肝膽經風熱血燥或怒動肝火或肝客淫氣所致
蓋肝熱水涸腎氣不榮故精亡而筋攣也宜以地黃丸滋腎
水以生肝血爲善若用蛛絲纏螳螂蝕著艾灸必致多誤大
抵此證與血燥結核相同故外用腐蝕等法內服燥血消毒
則精血愈虛肝筋受傷瘡口翻突開張卒成敗證

府庠朱宏仁年二十右手背近中指患五疣中一大者如黃豆
餘皆如聚黍拔之如絲長三四寸許此血燥筋縮也用清肝
益榮湯五十餘劑而愈○府庠沈嫗文幼齒指甲及長不能
自禁余曰此肝火血燥也又頸側常生小疣子屢散屢發又
臂生一塊如菜豆大若觸碎則如斷束縷扯之則長縱之則
縮後兩鬢發白點求治余曰子素肝病此部亦屬肝膽經也
夫爪爲筋之餘膽行人身之側正與齒爪生疥等證相應須
滋補腎水以生肝膽則諸病自愈矣乃與六味地黃丸服之
二年白點自退疣亦不生○一男子小腹中一塊不時攻痛

或用行氣化痰等藥不應猶以爲血驚服行氣逐血之劑後
手背結一痲子漸長寸許形如驚狀肢體間如豆大者甚多
彼疑驚生子今發於外亦用行血虛證悉至左尺洪數關脉
洪數而弦余以爲腎水不能生肝木以致肝火血燥而筋攣
用六味地黄丸生腎水滋肝血三月餘諸證悉愈○一婦人
左手背並次指患五六枚如熟椹內熱晡熱月經素不及期
余曰此因肝脾血虛而有熱也當調補二經使陰血生而諸
證自愈不信乃用艾灸手卽腫脹發熱手指皆攣兩脇項及
胸乳間皆患疣經行無期余用加味逍遙散少加炒黑黃連

數劑漸愈乃去黃連更佐以歸脾湯各患漸愈又百餘劑經
行如期再用地黃丸三料而痊 俱薛按

論列方 外科下

四物湯 補八

八珍湯 補十九

一陰煎 新補八

四順散 外一五四

八正散 寒百十五

五積散 散三九

五苓散 和一八二

四生散 外一八七

三氣飲 新熱十七

十宣散 痘十四

四七湯 和九七

五寶丹 外二百五

六味丸 補一二一

四神丸 熱一五二

二神丸 熱一五一

八味丸 補一二二

理中湯 熱一

歸脾湯 補三三

生脉散 補五七

大營煎 新補十四

還少丹 補一三七

右歸丸 新補五

芎歸湯 痘十五

坎離丸 寒一六五

內寒散 外二三

保陰煎 新寒一

聖愈湯 補九一

托裏黃芪湯 外八

玉露散 婦八九

托裏散 外三五

排膿散

外一六二
又一六二

寧肺散

固六

寧肺湯

補六三

連翹湯

外五十

桔梗湯

外一五一

犀角散

痘六三

射肝湯

外一六八

消風散

散四七

漏蘆湯

外九五

化毒丹

外七六

擯蘇散

外一八八

搜風湯

未入

涼膈散

攻十九

回生丹

外七九

通關散

因九八

奪命丹

外七七

通氣散

外八十

大黃湯

外一六七

必效散 外一七二

枳殼散 寒百一

承氣湯 攻一

清涼飲 外九十

會膿散 外二百七

桃仁湯 外九四

槐花蕊 新因四十

牡蠣散 外二百八

萹薹湯 外二百一

槐花酒 外百四

苦參丸 外八七

滋腎丸 寒一六三

導水丸 攻七一

蠟礬丸 外七四
七五

當歸丸 外百

黑丸子 外二三七

茯苓膏 外二百四

四君子湯 補一

六君子湯 補五

仙遺糧湯 外一九八

小柴胡湯 散十九

小青龍湯 散八

大防風湯 補九九

小烏沉湯 和二一八

大秦芫湯 和二四五

大蘆薈丸 小百十五

牡丹皮湯 外一六七

牡丹皮散 外一六五

瓜子仁湯 外一六四

薏苡仁湯 外一六四

紫苑茸湯 外一五六

梔子仁湯 寒十九 外二八

五加皮飲 外二百

製甘草湯 外六八

金銀花散 外四

仙方活命飲 外一

人參敗毒散 散三六

神功托裏散 外四

補中益氣湯 補三一

十全大補湯 補二十

荆防敗毒散 痘三一

參芪補肺湯 外三十

內補黃芪湯 外九

參苓白朮散 補五五

參朮補脾湯 外二九

人參養營湯 補二一

人參平肺散 寒三七

參芪內托散 痘七

九味異功煎 新因二二

加味歸脾湯 補三四

當歸補血湯 補四五

加味四物湯 補九

加味地黃丸 外三九

當歸川芎湯 外四十

加味逍遙散 補九四

附子 湯 外三六

加減八味丸 外三八

益氣養腎湯 外三一

托裏當歸湯 外十

托裏消毒散 外二

內托羌活湯 外二二

補陰八珍湯 外三二

加味羌活湯 外四三

九味羌活湯 散四四

清肝益營湯 外八三

復元活血湯 外二百四十

當歸拈痛湯 寒百三十

芍藥蒺藜煎 新因三五

龍膽瀉肝湯 寒六三

加味龍膽瀉肝湯 寒六四

黃蓮解毒湯 寒一

普濟消毒飲 寒十三

升麻黃連湯 外四九

連翹歸尾煎 新因三二

連翹消毒散 外六一

蠲痺消毒散 外二百二

梔子清肝湯 寒六十

芩連消毒飲 寒十四

五香連翹湯 外五一

換肌消毒散 外二百二

柴胡清肝散 寒五九

清心蓮子飲 寒三二

黃連消毒散 外六十

葛根牛旁湯 外四五

白芷胃風湯 外四四

內疎黃連湯 外九三

犀角地黃湯 外四六

犀角升麻湯 外四七

解毒防風湯 外六三

秦艽防風湯 外二二二

神效瓜蒌散 外一八一

獨活寄生湯 和二百七十

防風通聖散 攻十六

當歸導滯散 外二二九九

五利大黃湯 外八九

五福化毒丹 外七六

飛龍奪命丹 外七八

方脉流氣飲 外五四

牛黃雙解散 外二百九

遇仙無比丸 外一七五

瘡科流氣飲 外五五

加減小續命湯 散五二

青州白丸子 和百十二

滋藥降聖丹 外二三四

不換金正氣散 和二一

十味沒藥丸 外二三五

本事接骨方 外二三三

葶藶大棗瀉肝湯 和百四十

秘傳正骨丹 外二二三三

楊柳癰漏方 外二百六

雄黃解毒散 外一二四

廣瘡點藥 新因四二

洗損傷方 外二四九

杖瘡四方 外二五三

附子餅 外百十六

豆豉餅 外百十七

木香餅 外百十八

桑枝炙 外百二十

猪蹄湯 外一二五

騎竹馬法 外百十四

百草煎 新因三七

葱熨法 外一二一

鍼頭散 外一四四

降癰散 新因三六

神功散 外一三四

金黃散 外一九五

如神散 外一七四

螵蛸散 新因三八

冲和膏 外一三八

太乙膏 外三百八

當歸膏 外三一四

火龍膏 外三百二十

琥珀膏 外三一七

神異膏 外三百十

會通膏 外三百九

烏金膏 外一四二

蒸蘆膏 外一四八

芫花線 外二二九

秘傳水銀膏 新因五七

景岳全書四十七卷終